

如阜縣志

ル 5

3280

6



門 几 5
號 3280
卷 6



如臯縣志卷十五

名宦傳

名實之賓也實至而名歸焉官斯土者或以德或以功流澤所遺愛之慕之終不可諶當時留榮矣迨其後久而彌彰其所建樹者異也志名宦

唐李承實黜陟使始築捍海堰東距大海北接鹽城合通秦如臯袤亘一百四十二里遮護民田屏蔽鹽竈其功甚鉅後圯壞宋天聖間范仲淹因其基修築之近十竈中有大王廟或謂卽祀承實云

宋范仲淹字希文蘇州吳縣人舉進士第爲廣德軍司理參軍改集慶軍節度推官監泰州西溪鹽稅時海堰久

如臯縣志卷十五名宦

昭和十八年
八月十八日
購求

如皇果元 卷十五
地鹹水入田害稼仲淹具書白發遣使張綸請修復奏
上以仲淹令興化董修築之役隄成竟通泰海三州蜿
蜒數百里以衛農田三州民始獲畊穫至今呼爲范公
隄云後爲參知政事江淮旱蝗帝命仲淹安撫江淮間
開倉賑卹又奏蠲折役茶江東丁口鹽羨江淮民終蒙
其惠焉封汝南公謚文正

國朝詔從祀兩廡邑有專祠

張綸字公信潁州汝陰人淳化間除江淮制置發運副使
先是泰州捍海堰歲久圯廢海濤入冒民田范仲淹來
監西溪倉具書白綸力議修復論者難之綸表三請願
身自臨役命兼權知泰州卒成堰復遺戶二千六百州

民利之爲立生祠

徐的建州建安人仁宗時爲淮南江浙荆湖制置發運副
使奏疏通泰州海安如臯縣漕河詔未下的以便宜調
兵夫濬治之計出滯鹽三百萬云

岳飛字鵬舉相州人建炎四年遷通泰鎮撫使兼知泰州
會金兵攻楚州急詔張俊援之俊辭乃遣飛行飛抵承
州三戰三捷還守通泰飛以泰無險可恃退保柴墟戰
於南羈橋渡百姓於沙上嘗將兵過臯道渴得井汲盡
泉輒湧出歎曰此聖井欄也至今人呼度軍井

明唐順之字應德武進人舉嘉靖八年會試第一歷官春
坊抗疏請東宮受朝賀奪職家居者二十年會倭躡江

女學果志 卷十五
南北以兵事起家爲職方郎尋加通政視師海上提援
師與撫軍李遂副使劉景韶相犄角躬擐甲胄率諸將
搗賊於馬邏順之日來船真倭而力聚去船脅從而衆
分擊去船十不如擊來船一於是益擊來船姚蕩之捷
公出奇畫斬獲甚多以功擢僉都御史巡撫鳳陽是歲
大祲順之周旋於師旅饑饉間旦夕不懈自斥俸入又
請餘鹽截運米條畫賑事甚詳民賴以存活者數百萬
是時順之疾已革猶出巡海上整戎旅考荒政汲汲不
已遂卒於泰州之姜堰鎮朝野惜之

劉景韶字子成湖廣崇陽人以進士爲海防副使嘉靖已
未倭薄如臯景韶親勒部曲敗賊於丁堰再敗之縣東
門賊乘夜遁而趨廟灣軍門李遂因大破之既而江南
逆虜復犯通州景韶選輕車數百扼如臯之汙河以斷
賊西向而自以其兵同邊將邱陞待賊於西場少頃賊
果至景韶臨陣奮勇矢石如雨諸將皆懼景韶畧無怖
色張兩翼以衝其堅遂大勝斬三百有奇賊奔仲家園
追圍之三晝夜缺其一面賊終不敢潰圍出斬酋長以
下千五百二十有七級生虜十五人又殲餘黨於劉莊
臯邑賴以安堵保障東南奏平倭功第一陟官都御史
所在皆有像祠祀之

李遂字邦良江西豐城人進士嘉靖間倭亂以都御史督
淮揚軍務至則日夜治戰守備造戰艦數百艘合馬步

水兵訓練之百具咸飭已未倭分道入寇遂命副使劉景韶遊擊邱陞扼如臯而自馳至泰州當其衝是時賊勢張甚副將鄧城敗績指揮張谷死焉賊知如臯有備將犯泰州遂急檄景韶陞連戰丁堰海安通州皆捷賊沿海東掠遂喜曰賊無能爲矣陰令景韶陞躡賊行晝薄之使不得休夜稍却以杜其後會他賊攻如臯丁堰者敗攻馬邏者又敗諸倭敗者悉合競趨廟灣堅巢固守月餘不克遂令景韶塞塹夷木壓壘陳火焚其舟賊乘夜雨潛遁官軍據其巢追奔至蝦子港盡殲之已而三沙賊復入又連破之前後二十餘戰斬獲三千八百有奇賊悉平遷兵部侍郎

鄧曉字奎甫海鹽人嘉靖二年進士授職方主事歷太常卿拜刑部侍郎俄改兵部總督漕運時值倭亂江南漕艘幾阻曉請發帑金數十萬造戰舸築城堡練兵將積芻糗詔從之中國奸民利倭賄通州人顧表者築黯爲倭導以故營砦皆據要害盡知官兵虛實曉懸重賞捕戮之募鹽徒驍悍者爲兵增設泰州海防副使築如臯城海口皆增兵設墩遂破倭於通州連敗之如臯海門襲其軍呂四圍之狼山前後斬首九百餘賊潰去遷南京吏部尚書帝以曉知兵改右都御史協理戎政尋拜刑部尚書隆慶初賜太子少保謚端簡

邱陞字嵩山河南封邱人由武舉官守備擢山西平陽遊

擊將軍嘉靖丁巳倭寇江南陞提邊兵鎮守是時倭圍
通州副總兵鄧城不能禦陞援之至白蒲鎮遇賊陞揮
兵過其鋒斬百二十餘級賊又襲如臯競趨丁堰陞追
勦斬百三十級生擒二人賊薄如臯城陞陳兵東門外
斬數十級賊却退據龔家莊鄧城復引兵與戰賊乘勢
長驅臯民被害甚酷陞奮勇晝夜搏戰於仲家莊櫻桃
園勝之賊沿海東掠陞合副使劉景韶尾賊晝蹙之夜
則杜其後被賊於廟灣復殲之 子港前後斬數千級
築爲京觀樹以碣至今呼爲平倭塚論功擢揚州參將
復追賊至海安戰於曹家莊敗績越七日陞奮怒環甲
身先士卒力斬九十餘級倭勢促奔泰興所存才三十

餘人陞誓翦盡乃食窮追三晝夜單騎至新沙日已昃
馬蹶陞仆爲賊所害士民流涕痛惜都御史鄭曉疏於
朝建祠祀焉

宋胡令儀陳留人淳化至道中以大理評事知如臯時江
淮內附未久吏奸民囂凌弱暴寡令儀以德綏化教而
弗率糾之以刑不少宥人皆凜然憚之先是江淮發運
使張綸用范仲淹議築捍海堰甫役值大雨雪役夫有
死者衆遂謹言堰不可成朝議遣中使按之將罷其役
綸以令儀嘗知海陵如臯熟悉潮患請移爲轉運使按
究可否令儀馳至卽抗疏力主范議請必成之堰遂成
二邑逋民悉復其業邑人於張范祠增祀公爲三賢復

祀於名宦祠

錢治字良範景德二年甲科歷祕書丞知如臯長於決獄
六宰大縣皆有能聲如臯民不農桑以鹽爲業治曰使
民足以衣食鹽猶農也乃悉求鹽利害爲條目民便之
治在臯時年五十或嘆其仕不達治曰使吾政行於民
卽達也再遷屯田員外郎通判宣州未行而卒

錢勰字穆父臨安人少有才名以進士令如臯會歲旱蝗
泰興令獨給郡將云縣界無蝗未幾蝗大起郡將詰之
令詞窮乃言縣本無蝗蓋自如臯飛來請檄如臯令嚴
捕蝗勿使侵鄰境勰得檄書其紙尾曰蝗蟲本是天災
卽非縣令不才旣自敝邑飛去卻請貴縣押來傳至都

下無不絕倒後歷官翰林學士終戶部尚書其孫湜載
孝友傳後遂爲臯人矣

曾易占字不疑南豐人天聖二年進士大中祥符間以太
常博士知如臯值歲大饑請於州得越海轉粟所活凡
數萬人明年稍稔州課民賦如常易占力請緩征時他
縣民多亡臯獨安集又創建學宮海隅咸知絃誦厥功
茂焉後以子布貴追封魯國公祀名宦祠

許元字子春宣州宣城人以父廕補郊社齋郎調縣尉稍
遷泰州推官知丹陽縣會歲大旱元請借練湖水溉民
田不待報決之溉田萬餘頃歲以大豐遷太子中舍知
如臯士民愛之元爲吏喜修廢壞長於治財時京師粟

少而江淮歲漕不給參知政事范仲淹舉元爲江淮置制發運判官元至悉發瀕江州縣藏粟所在留三月食遠近以次相補引千餘艘轉粟而西不數月京師足食已乃嘆曰此權宜救一時乏耳歲漕不給弊在有司乃明約信令發歛轉輸皆有程度度其遠近稽其遲速以定賞罰數千里外譚笑治之不擾不勞特賜進士出身官至刑部郎中天章閣待制以疾乞守郡乃守揚州越州又徙泰州卒歐陽修誌其墓

趙抃字閱道仁宗時令如臯崇學校董師儒不立異政以拂民情因俗施教惟以惠利爲本黃震言其爲政愷悌不嚴而肅雖古循良無以過也至和中參知政事以論

新法去官卒謚清獻

洪咨夔字舜俞於潛人嘉定二年進士授如臯主簿後應博學宏詞科崔與之帥淮東辟置幕府邱壽鶴代與之爲帥金人犯六合揚州閉門自守洪亟詣鶴曰金忌楚必不至揚敵未至而閉門是示弱也江左人心震動金人覘我虛實速其來矣請遠斥堠精間諜簡士馬張外郡聲援而大開城門晏然如平時金人果來我當身任之雋愧謝已而金人果去如其言積官端明殿學士

鍾穎字元達丹陽人以進士爲泰州馬塘場催煎官歲饑民煽爲盜部使者訪消彌之策穎條十事其尤切於職守者乞減竈以紓亭民濬河以便商販使者用其策由

是人情帖服鹽利大興秩滿調真州六合令

元陳肇衡福建莆田人爲如臯尉有惠政報滿以浙閩兵亂未歸遂卜宅於如臯之下駕園家焉無子一妻二妾皆不育復置一妾甫入門涕泣不止問其故曰吾亦故家女也父有罪無力入贖爰賣身得金以救父耳肇衡爲之惻然卽日送還其家不取聘資越數日天大雷雨前妾感雷而娠生男因名應雷中延祐三年解元

明史搢順天三河人持身廉潔處事周詳九年任滿老人冒嵩等赴闕借留復任遂卒於臯子孫因家焉

曹立山東臨清人初任臯時官署頽圯立次第修築尤加意學宮一新規制士論歸焉

向翀四川通江人以進士令如臯持身清介莅政逾年百廢具舉重新學舍更造祭器士民咸稱述之

胡昂定興人成化十七年以進士爲臯令簡樸嚴明不施鉤距衆自凜然隣邑有訟未決者民皆質成於臯屬歲大饑白當道截留蘇松上貢米賑貸貧民全活甚衆祀

名宦

劉文寵玉田人宏治初以進士令臯有才幹民不能欺縣編種馬額一百三十七永樂間六安州以被災寄牧官馬千三百餘沿爲民患時值部使清理馬政寵力懇建議除寄牧之令民獲甦息至今德之

田惟祐浙江蕭山人舉人莅政通敏吏畏而民懷之時山

東流賊肆掠江淮攻通州甚急官軍過縣無御有方民不驚擾遷知泗州

王世臣昌邑人正德戊寅以進士知臯時屬大水民艱食臣躬詣村落詢求疾苦自當道賑卹之性廉潔日用不時給每貨之同僚需月俸以償未及報政治行大著以勞卒於官垂素蕭然見者隕涕

徐相都昌人正德季年以舉人爲臯令清儉剛決門絕苞苴無一人敢窺吏舍聽訟不遺胥勾攝兩造既具反復曉告民皆媿服自奉菲約不飾厨傳歲省坊里冗費無算時值饑疫率醫士齋善藥日巡委巷中親視病者注藥授之備極勞瘁所全活萬餘人雨雪愆期必青衣步

禱禱亦輒應會當入覲公私不知行期一日匹馬戒塗攜一門一皂去襪被蕭然父老感嘆後遷知連州民久而愈戴其惠祀之名宦

梁喬升廣東順德人進士治尚平恕政教兼修清復王龍

圖墓創祠祀之重表王狀元坊建丁孝子祠前志所載

善蹟甚多如梁公十井之類遷工部主事

劉永準北直隸任邱人以鴻臚寺序班令臯峭峻矜嚴豪橫歛跡對簿不實者莫敢畢詞臯初無城永準創建六門民稍免於倭難遷知壽州

黎堯勳四川樂至人嘉靖間登進士被命莅臯始下車見人文堙鬱嘆曰茲胡安定王龍圖鄉也何以至是擇地

如皋縣志 卷之五
得嶽廟址移學宮就之以興賢育才爲務嘗讀文丞相
如臯道上詩謂此名賢寄跡地不可無祠初祠祀之每
月朔必謁安定祠集諸生考業於中別構崇一堂示以
二業合一之旨士類蒸起念田賦不均逃亡日多豪家
悍竈兼并大爲民患特具疏請於朝既得請紀以詩曰
誰捧天書下紫宸海臯草木盡精神而今鼓舞輸租者
不是當年逋賦人又曰烹鮮海上又經春河內深慚借
寇恂豈有涓埃能報主空餘琴鶴自隨身虛糧積歲追
逃屋履畝從今稅富人稍喜流移歸滿路聽歌鴻雁動
比隣愛民之心溢於言辭矣諸所鈎剔咸中情隱黜桀
者重足立民至今蒙業焉祀名宦祠

劉一中江西泰和人操履清潔人不敢干以私時集士民
講餘姚良知之學遷南刑部主事

童蒙古浙江臨安人舉人莅事通敏濟以寬和創望江樓
二烈祠又申革帶辦泰興周家橋兵夫銀五百有奇舊
邑志散逸蒙古修復之所爲皆一時善政云

仇炆長治人嘉靖癸亥以進士知如臯視身廉正公庭肅
如胥隸重足立無敢需民一錢炆自許不爲俗吏作勤
民歌俾民知教有盧媪以節烈著衰老貧病遠在西垵
炆造其廬分俸食之繫以詩曰人心斯理本不忘鄙薄
聞風或興起邑諸生張可學病不起其婦葛先一夕自
經死炆聞嘉其烈親爲文以祭割俸葬其兩棺後以夜

女皇縣志 卷十五
禁過嚴失邑貴人意蜚語左其官炅灑然攜襪被去至境上檢得象箸一雙誤入行李亟封還其廉介如此祀名宦

嵇錕字子佩德清人嘉靖末年由舉人授臯令初至卽罷私奉金二千有奇釋盜誣坐死罪者十八人邑濱海百戶余顯橫鷺海上錕鉤致顯客得其狀治之皆伏法戍海每歲易汛爲民患苦錕先期爲畫界與戍將約毋犯吾民一日戍卒殺漁者錕執之詰戍將戍將立殛卒謝錕歲饑賦多逋錕以羨金代民輸中丞臺檄臯移羨金治泰興學宮錕謂臯學亦地辭不移臺再檄佐饜錕又抗言臯下邑不宜獨承饜且民饑流亡柰何中丞銜之

卒中以考功法去之日士民遮道泣如失父母錕後補慶符舟出京口幾覆有旁艘來拯詢知故臯令也率其徒拜橋下曰德公無以報今日乃天假之也

唐邦佐字中廓浙江蘭谿人隆慶元年進士知如臯縣明敏剛決摘發如神宿猾巨奸一時幾盡政暇雅喜課士士多獲售者以才能調儀真時歲賦民間架錢十萬七千及造舟築隄費民甚苦之佐以官稅之羨代之舟隄均之各邑民困以蘇嘗避雨僧寺雷電繞之遂留宿夜夢披髮血淋漓者走至樹下沒曉伐樹得男子屍則夫與婦行過寺寺僧殺夫瘞之婦尚在於是誅僧藉其居其發摘類如此治行爲江北第一璽書賜金褒勞以不

能阿權貴僅擢刑部後謀劾江陵奪情中以計典去
鄭人達福建閩縣人以進士爲儀真令萬歷初與前令唐
邦佐互調時以鑿江地衝唐有搏擊聲遂移代達達至
臯約已率民蠲培寬逋與民休息邑支給歲有額編逋
曲爲節省不給捐俸代之院署供帳器具率里役更相
稅貸頗擾民達發帑自創簿正之歲額一切罷去乙亥
大饑枵腹待哺者環野達便宜發賑全活甚衆當路屬
達察訪奸民檄甫至而告密者踵入達曰是奸藪也立
迹其人以狀報竟置於讞人人服達神明遷南戶部主
事去

劉貞一河南通許人以舉人令臯莅事嚴明語簡而當判
牘如山民無敢獻僞者雖盛怒遇士必解顏接之嘗延
沈生希周課其子希周父殉躬往弔焉時有侵二烈祠
地者移主僧寺貞一蹙然曰非禮也亟令反之祠修復
社學社倉戒僚吏無爲暴於民而馭胥隸嚴獲罪不少
宥隸皆惴惴無敢覬民一錢也善草隸書尤工題署上
官或以檄徵書輒謝不應卒於官輿櫬歸橐裝如洗
陳渙浙江臨海人舉人操行剛方善摘奸發伏擒治宿盜
數輩民獲寧宇而豪宗憚甚多方去之會有大盜獄力
爭忤上官意遂齟齬去

陳文進字國傳福建泉州府惠安縣人以選貢官如臯令
辯冤獄平江盜恤鹽竈濟鹽河所行多惠政陞永州通

判兼攝道州

宋文昌字德夫河南商城人萬歷己酉以進士令如臯加
意民瘼不孤行一意持己謙和人或干以私又凜然不
可犯市故有羨稅悉除之民當輸租聽其自入櫃里胥
無能舞弊者尤慎刑獄時時虞有寃滯有盧學詩者久
陷重辟燭其枉破械出之當路信其明察卒從昌讞牙
橋之役昌謂一鹽場乃令涸三州縣水執議閉勿啟民
方倚之會父卒昌扶櫬歸昌去而牙橋啟矣臯人爭肖
其像築專祠祀焉

周承恩湖廣武岡州人舉人政尚寬簡務在安全不忍疲
民以市上譽遷遵義同知

李廷材字柱可廣東高要人萬歷甲寅以進士爲臯令才
敏斷外若嚴急而中實坦易能爲民任事常行田歎曰
臯襟江濱海疑是澤國乃形勢高亢土脈中燥所挹注
者惟運河一衣帶水民終歲力穡樂利且不及隣封十
二牙橋又洩之其毒中於三州而臯特甚遂建議塞牙
橋又奸商給請巡鹽御史勒民計口售鹽雜以泥沙昂
索其值材執不可御史檄九下九覆不行民未之知也
復議建石礎通江河瀦水溉田造塔治東南境上以聳
龍脈志未竟調去留贖銀百二十金屬邑人新泰令李
上林成其事尋改涪州令卒於京口妻子僑寓潤州貧
不能歸上林爲白後令熊以所留贖銀返之始扶櫬還

民爲立去思碑

熊奮渭字佐文河南商城人萬歷丁巳以進士尹臯邑廉明敏幹慎重持大體愛民敬事於利病興革洞悉窳要舉行甚力不矯激近名雅負人倫鑒戊午分校南闈門下士皆一時人望臯是科登賢書者一卽渭素所首拔士冒生起宗也未兩載調泰興士民爭留之不得立祠祀焉後晉位浙撫壽躋百有二十歲嘉善徐季方見聞錄謂其百有四歲時尚投刺謁客云

李衷純字元白浙江秀水人萬歷壬子以選貢領順天鄉薦己未冬授如臯令明敏廉毅治邑如家洞矚情僞鋤慙恤隱興利除弊百廢具舉以崇化興賢爲首務請增

生員科試童生八學額數釐正祀典創建二忠報功兩祠以表忠賢載米之官賑活五萬餘人頒藝植之條布機杼之制以課農桑編戶口均徭役減遼餉漕務除陋規鹽政革商弊值江上盜起請設安民營造戰艦募兵百人以一鎮撫統兵巡勦海氛以靖民困以甦南造石礎資漑江湖北堽牙橋永疏水利牙橋奸民怨奪其利狂嫚爲梗偵得主名坐以法治臯凡五載園土無周內之民村落絕追呼之隸計謨碩畫信足爲後事師矣後爲揚州運使尋入爲戶部郎中純去後邑人立生祠二一在城北一在通江之石礎而又與諸臺合祀牙橋王珍錫陝西咸寧舉人天啟五年知如臯縣布政慈和雅

俗鎮定尤長於治才先是臯聚奸民號天罡虎棍爲閭閻害前令李公衷純獲渠魁置之法及公任餘黨復熾公廉得其數捕治之黨遂散時蝗不入境麥穗兩歧晴雨應禱邑人作三異詩頌之

吳宏功字毅銘湖廣江陵人天啟乙丑進士崇禎庚午補如臯縣有官馬百二十四匹供臺司按部役芻牧半累民間功捐俸以助民賴以安時北方告警調狼營兵入援過縣境功出犒師士馬皆歡騰去無驛騷居恒親賢愛士多所薦拔日判數十牘案無留獄有三人隸城旦書貧不能贖功代償而釋之賢聲大著考滿調江都令瀕行甬潦城垣圯盜所掠衣物貯庫者功悉以資畚鍤

又發金來屬簿尉修立發河橋曰此吾未竟之事也臯人德之立生祠祀焉

高名衡字平仲山東沂州人崇禎四年進士初授如臯知縣以廉能稱時臯邑市量大小殊製名衡曰量一則價不二下令畫一之且鈐記其上濬河修城多惠政考最入京歷官監察御史巡撫南河後與妻同死流賊之難楊觀吉字吉長福建詔安人令如臯值廣陵大旱步禱焚祝數日大雨如注溝澮皆盈惟時東自通州北自泰州三百里無涓滴獨臯民沐此澤洵誠感也

成德字元升霍州人占籍懷柔崇禎四年進士除滋陽知縣性剛介疾惡若讎以侮溫體仁戍邊居戍所七年用

御史詹兆恒薦起知如臯尋推武庫主事甲申都城破
闔門死難贈光祿卿謚忠毅

國朝賜諡介愍

李丹衷浙江嘉興縣人進士崇禎末年令臯申酉之際亂
賊陳君悅號召天罡黨立營挾制有司威令不行遂挂
冠去

閻士奇河南永城人嘉靖三十一年任如臯主簿時值倭
變縣故無城士奇親冒矢石樹柵欄積石礮灰瓶與守
備楊縉竭力堅守及巡撫鄭曉請帑修城士奇晝夜督
工慰勞備至工皆踴躍六閱月而告成倭復大至見城
中有備不敢攻而遁由是劉副使卬參將得追而殲之

後知縣童蒙古建劉公祠士奇附祀焉

康文美福建南平人吏員從謝侍郎杰使琉球還授如臯
簿操行修潔監收歲漕取平概自奉儉約退食止鱸菜
而已邑令王以蒙與同里文美非公事弗謁也後遷屯
畱丞

吳廷用金谿人萬歷壬午爲豐利場鹽課大使善撫丁竈
不苛求有流移者招致復業勸課竈家子弟皆令就學
多所造就以疾卒官人咸悼惜焉

巢有功山陰人任掘港鹽課大使條議鹽政多中窾要場
人爲之立碑

周鼎浙江餘姚人舉人天順八年任如臯教諭初臯邑無

志書鼎創成之儒學無田首置田八十畝以恤貧士自後長吏始有繼者其誼不可忘也

詹仕顯福建邵武人嘉靖初司訓臯庠能詩工繪事築一亭曰醉邵以堯夫自況也時延諸生觴詠其間嘗秋夜過許生訪見盆菊影落屏紙扶疎動搖乃濡墨就影寫之生態具足傳有秋堂影墨詩後遷教諭德化諸生繪十二圖互詠其事其風雅猶可想見焉

李士元洛陽舉人嘉靖庚子攝臯學篆性嚴介人不敢干以私士有貧者分俸卹之父嗜飲迎養日具酒脯盡歡其自奉脫粟時不繼也泰興姚令去奉檄往攝令事民有十姚不如一李之謠稍遷南國子監助教士咸頌其

清節

葉時宣福建壽寧人嘉靖三十六年任如臯訓導舊志不爲立傳邑乘備采援據閩書謂其歛儲金粟却賊全臯蓋有功於茲土者後陞泰州學正慶府教授

李公孝盱眙人萬歷庚辰司教於臯崇化勵賢高雅廉靖時時振士之乏當道察知其賢委視邑篆固辭不就未幾自免歸人稱恬澹君子

熊之徵昆明縣舉人萬歷十四年任臯教諭重行誼振倫紀科條詳密矩矱秩如月試日會品藻精嚴應聘分校棘闈有得士之稱焉

張思敬華亭人萬歷甲午司諭臯學懷德握醇寬然長者

善書性尤嗜學晚而不倦莅諸生惟以躬行爲化憐才振急不問脩脯居五載遷銅鼓教授去士長懷之

黃夢麒字野王江寧人萬歷辛丑來攝阜鐸性好客後堂常有絲竹聲倡議改作泮池架雙梁其上遂成偉觀時有皇莊之議沙民洶洶夢麒爲致書同年呂水部改稅稍輕焉尋遷分宜令去

呂克孝字公原萬歷二十五年應天鄉試第一授如阜教諭訓士先德行而後文藝嘗曰安定先生遺教猶存諸生學此足矣有門下士年少恃才克孝引禮義相誠勉曾有春雨種芝蘭秋風化荆棘之句士悔過終歸醇謹縣舊志散佚闕略縣令重其才請修之始有全書後遷

國子監助教累官工部郎中

楊縉武平衛人進士嘉靖三十三年倭入寇由守備調署如臯城守營遊擊與主簿閻士奇協力守禦射殺寇渠魁倭始退三十八年倭犯掘港巡撫李遂奏改掘港把總爲守備縉赴調甫至戰於長沙一鼓殲之因修築東西二堡居人德之爲建生祠後陞嘉湖叅將

檀武臣建德人萬歷初來任掘港營守備爲人介而寬善撫士卒時有倭船犯境臣生擒一人餘艘出之大洋欲令自斃隣境攘其功自效首虜臣不自白曰吾營無戰艦若不以計出之脫一登岼爲禍甚烈今幸無恙功奚必自已出哉人皆服其雅量後遷齊閩貧至不能辦裝

時謂素士弗遠也營中共爲置祠

王廷臣大河衛鎮撫進士萬歷八年任掘港營守備甫至卽築北境土山長百餘丈又以河流直射別濬一支自堡東轉北逶迤迴抱頗資防守場南古堤壞潮溢爲患力請部使增築月堤民獲安枕衆皆歸德焉

馬紹援金山衛指揮進士萬歷三十年官掘港營守備先是演武場設於堡內地狹不堪馳射援移置營前四望海洋形勢空濶於耀武爲宜時有豪家欲牟此地者百計旁撓不爲阻卒中讒以去論者惜之

趙廷皇陵衛千戶進士萬歷三十三年授掘港營守備嘗捐貲築西關長壩橫亘六七里居人免沮洳之困又塞

北流之冲城者改引從西衆咸稱便

管大藩徐州人萬歷中莅掘港營守備爽朗有籌略曉暢兵事校練軍卒壁壘改觀馭下不爲朘削甘苦共之士氣大振藩常築隄海上所費金錢以千計海上得免漂滌之患德藩尤深藩去爭欲祠之張范間藩聞亟止之至今東方銳卒必推掘港實藩所啟也

趙千駟南京留守後衛百戶進士萬歷四十四年任掘港營守備著有防海六議

國朝

王士徵字貽上山東新城人進士順治十七年授揚州推官公正嚴肅文藻瞻麗嘗按行臯邑修襖水繪園賦詩設讌於政事無留滯臯人深被其澤游歷刑部尚書

林起龍大興人進士康熙元年巡撫江蘇先是順治十八年蜀滇用兵加徵練餉如臯縣由單民竈田三萬八千三頃四十九畝有奇未折大畝照每畝一分應加三萬八千三兩實田止二千三百四十八頃三十三畝零知縣李振奇已徵解八千餘兩具詳督撫爲民請命憲催逾急弗爲奏請民死徙者相續振奇再四請會起龍繼任具疏特題得免百姓歡呼如解倒懸

于成龍字北溟河陽人康熙二十一年總督兩江貪墨吏望風解綬豪猾皆潛徙境外凡有關國計民瘼者次第舉行臯令盧縉詳請革除積弊各款備極獎譽一一如詳勒石永禁

莊有恭字滋圃廣東番禺人狀元巡撫江蘇乾隆十九年題奏豁如臯縣坍塌蘆田四萬九千五百一十畝三分六釐零蠲免課銀二千三百四十四兩二錢六分零二十一年勒碑永禁海安鎮徐家壩又勒碑定例脚夫匠役工價及永禁私分地界霸佔壟斷皆千百世利澤與江海俱長者也

朱邦政淮西人順治初由百長署如臯令以下臯城功也先是明燕京失守福王立江左高傑縱兵暴掠聲言東下臯民陳君悅劉廣生等集衆結立中營爲守城計五月知縣李丹衷逸去陝西馬御鞏銜我

朝命令臯邑悅等乘夜襲殺之并殺典史王家瓚櫻城自守七

如華縣志 卷十五
月邦政以巡撫趙福星檄偕將張士忠孟三澗等率師
取臯約先入臯城者卽爲令邦政先登遂主縣事君悅
等棄城走時沿海賊起守裨士才百餘九月賊夜圍臯
城邦政率衆固守越三日方蓐食忽聞城西鬻策聲亟
命上城吹簾應之悉甲以待少頃數百騎自城南來邦
政急開城東門率數十騎繞賊營而北橫斷其陣賊亂
乘之盡潰俘斬數萬人餘衆悉奔臯賴以定

陳秉彝字天倫奉天海州衛人由廕生令如臯樸直廉毅
始至臯若不嫻吏治者居無何懲奸誅暴軫恤民隱日
有惠政鯨寡孤獨尤多矜恤公餘必讀書數章讀論語
故事而信節用而愛人慨然嘆曰牧民者當如是矣讀

書有所得輒思力行邑人冒義賑饑染疫彝爲禱於城
隍神而襄遂愈會考最以給事黃門召去後爲邑人許
直疏請卹典載在史書

李樸字子固湖廣景陵人以明經授臯令初臯多奸民上
下諸司椽曹皆左右之間持縣官急凌市廛指揮操縱
遇事風生邑人莫敢誰何樸下車廉得渠魁十三人晨
起易吉服坐堂皇數其罪狀悉杖斃之奸兇斂跡臯人
至今頌焉

李振奇字平子河南商水人順治間令如臯治尚清靜聽
訟片言立折愛民禮士士爲所拔擢者遇之如家人踰
年江南抗糧事起奇下令剋期數日逋負者急自白有

諸生貧甚無以償積逋奇代償之己亥六月海上氛起
舳艫蔽江軍汎不通沿江城守多解散奇集紳士謀曰
臯城小而僻賊必不肯棄舟深入但諸場爲鹽徒出沒
地不可不備因密遣人語其地之大姓結武勇嚴偵探
以待之遂擒賊首衆悉驚散臯不懼兵及者奇力也又
二年會加徵練餉奇坐明倫堂集衆議父老聞故事無
以大畝小畝之說告者徵輸倍他縣後覺亟請於上官
得減其半臯人思其德爲之立碑焉

李文秀字奎瞻直隸易州人丁未令如臯勵廉隅除積弊
日與民間問疾苦環臯城種柳數千株綠陰冉冉邑人
劉增琳詩沿城陶令柳春到折柔莢醉眼寒猶澁纖眉

暖漸齊橫垂疑路窈窕密覺天低色嫩黃金鎖浪翻碧
玉迷迎風疏弱線彈汗濺香泥不亞甘棠樹行將拂彩
霓公餘課士以先正爲法己酉壬子乙卯登賢書者悉
秀所識拔士一時稱爲水鏡云

高瑚奉天遼陽人廕生康熙十二年知臯縣用舉人宗範
議裁革里長廂長立櫃交兌四大弊

趙宏化字亮弼山西壽陽人戊戌進士由密雲令補如臯
值南徼軍興征繕嚴急檄書旁午宏化經營措辦又軍
後凶年民不堪命化復多方賑救不遺餘力一邑咸頌
其仁三年以外艱解任因公留臯一年遂卒於臯士民
傷之

周鼎鑑字振菴鑲紅旗人為政務得大體臯隸戾而民窳役每恃官符窘辱士民索其賕無敢弗應者鼎鑑廉其弊隸受賕必扶遇事必袒士而抑役以故士氣益伸念士民寡者入賦多不能如縣官約悉召致詢其期有待束脩待禾稼者各立券以俟先縮俸以貸之人亦感其義弗忍欺會錫

御書勒珉而亭之亭後壘土為山以振地脉先是臯士六科無一

售者是科江源遂登賢書辛卯饑且疫斥資賑粥施藥為一邑倡民賴以全活後遂率為常海陵有唐灣為盜藪鼎鑑攝海陵築蓋屋百楹招民五十戶居之成市焉迄今名曰周公舖羈旅單舸風雨夜泊毋戒心也生平

慷慨好施與知人善鑒士其所獎拔盡掇巍科成名宦人文之興於斯為盛他如禁科擾勸樹藝殲巨盜攝市狙可以安百姓者力為之而大指務於寬厚法官二十二年中吏議落職沒於臯子六人皆列顯貴至今父老咸謂鼎鑑不縱胥役養士愛民因獲其報云

曹樞字建中浙江桐鄉人進士以文章知名海內雍正初莅臯興崇正書院治民惻悞無華

馮國祺浙江會稽人例監保舉令如臯雍正十一年率邑人捐穀賑饑十二年詳請隨漕捐賑

丁元正字一峰湖南衡陽人以拔貢選授臯令善古文工書法如許忠愍傳陳忠肅公墓考皆其手筆也建普濟

堂興革諸大政子丁牲中壬午科本省解元

鄒廷模浙江仁和人監生考職縣丞陞臬令乾隆三年如
臬早詳請撥運庫銀賑濟貧民五年蘆田蟲災詳請照
各圩受災輕重蠲免蘆課

李光泗字泗水號杏村湖北荆門人乾隆丙辰進士性廉
介丰采靄然而不可干以私鞫獄詳慎民無冤抑重學
校禮遇諸生馭吏和而正吏亦無敢骫法為政平易近
人民陰受其福二載丁內艱去去之口攜圖書數卷而
已士民至今思之

趙廷健字永齋陝西富平人進士因前令曹樞所建書院
取師於本邑地又狹隘議另建講堂延聘他邑通籍而

優行者掌其教授前賢張玉成露香草堂改作之移崇
正書院育才圩復興沙田益以紳士捐田為脩脯膏火
資上其事於各憲允所請初名雉水書院今改雉水為
發揚

鄭見龍字宇文浙江淳安人由舉人補鑲白旗教習乾隆
丁卯任如臬臬負海枕江地多斥鹵保聚為難公寬仁
明恕治邑如家延耆老咨詢利病舉行甚力牘李家堡
老鸛嘴以資民灌溉利竈樵煎城中市河壅淤日久設
法疏濬之歲庚午奉憲纂修邑志正譌補缺舉要芟繁
兼眾長而斷以己意至葺治義學勸輸育嬰堂請修城
郭請豁沙田冊賠皆孜孜為民在官五載廢修政舉辛

未正月卒於任子梁柱等扶其櫬歸葬淳安

李棠直隸河間人進士乾隆十六十七年兩署臯縣多善政有令名奉祀宋陳忠肅公薨入岳忠武文忠烈祠改二忠祠曰三忠祠

陳琨浙江海寧人進士知臯縣事明敏有神君之號每判獄據案疾書排偶散行無不播傳人口斷曲直兩造咸服乾隆十七年吳顯隆盜開牙橋琨請莊大中丞履勘立碑永行壩堵邑民利之

何廷模字西舫浙江仁和舉人簡發授臯令彊幹饒才畧遇事尤詳審豪暴屏跡胥役肅然調沛縣遷高郵州奉檄修如臯城紳士耆老皆歡欣迎馬首役夫踴躍辦工

工既竣模由海州俸滿藉保固例卜宅臯邑士民朝夕見如家人父子延掌臯邑書院終於臯子承燕承薰俱仕宦有聲

崔正音直隸寧河縣人進士乾隆三十二年選授臯令承辦城垣與前縣高郵牧何廷模分段並作材良工省嗣奉檄委員查丈臯邑田畝正音揭稟縣計額田三萬八十三頃四十九畝一分六釐僅缺田一畝二分五釐一毫缺課九釐有零歷係經征之員補足絲毫無欠前憲批准在案今以畝餘缺額之地履丈三萬八十餘頃之田以不足一分之課滋擾六萬三千有奇之戶累月經年未得寧息仰邀憲恩准免委丈則下邑數萬戶之擾

累可息課銀永無虧缺矣事遂止

譚大經字敷五廣東新會縣人進士乾隆五十一年授知如皋縣事縣自崔令去後十餘載吏治闕冗胥隸訛法大經甫下車整飭吏治民氣頓甦爲治期年比戶書官清民安設香燭於門有顧姓被殺嚮切煮之拋骨肉城根外莫得主名大經齋宿城隍神廟夢牌書叔夜二字寤曰得非周五乎拘而訊之蓋與顧妻奸謀殺其夫招伏成讞正直通乎神明乃信然也調任武進空城出送登舟

曹龍樹字星湖江西星子縣舉人大挑分發題任臯縣能詩著有白鳥瑞麥勸農諸什載星湖集設局修臯志未

果澹泊河未竣在任八年以疾去刊所知贈餞詩曰攀

轅集

董雲浙江會稽人善書畫康熙中初設丞不預民事惟理河渠水利與縣官周鼎鑑相得無閒時畫米山寫華亭書至今尚有弄藏者

龔培學浙江仁和人例監任臯丞守貧力政士民稱之祝椿字雲橋武進人三中副榜舉人就職臯丞著述甚富以風雅稱於時運餉金川著有蜀道集

易祖愉字天有湖南湘鄉人保舉補授西場司巡檢士民多愛之愉工詩善書畫舊爲梁園賓客乾隆九年多羅慎郡王贈以詩序曰天有易君下榻西園最久才華敏

瞻而賦性端直余深重之丙辰謁選得松門尉曾作詩
贈別近以奏最入都補授如臯於其行也不勝繾綣屬
望之意復贈之以此詩曰牽絲舊傍天台郡捧檄今趨
射雉城向日驂騮初展步摩雲鸞鶴有先聲夢迺楚岫
千層碧心注淮流一派清試數昔賢多作尉不因官小
晦詩名

黃肇楷浙江山陰人由未滿吏捐從九品乾隆十五年任
石莊司巡檢兩署西場司有能聲著詩甚富送李長官
棠詩有爭羨龔黃書上考慙非屈宋作衙官之句蓋胥
吏中之不易見者

羅玉果江西廬陵貢生雍正十三年以州同借補豐利場

大使黃沙洋堤久廢每秋汛泛濫洪波逕入內地前場
官修築土走沙流迄無成績玉果蒞任捐募興築屢築
屢墮乃朝服北面拜誓以死觀者感泣堤竟成至今猶
固

湯惟鏡常熟人乾隆二十五年任掘港場大使凡商竈之
務靡不舉場去江津寫遠惟恃運鹽河一衣帶水以資
農畝常苦旱潦鏡建策於場北之陸家河豐利之黃沙
洋二處就堤築閘以均蓄洩農民賴之

汪文輝字意園上元人貢生乾隆二十七年任豐利場大
使釐政餘閒遊心澹泊築秋水亭以自適後遷南梁金
鹵志餘有詩云簿書未許乞閑身此去南梁莫厭貧留

得空庭秋水在兼蒼露白望伊人

鄒武鉞無錫人貢生任豐利場大使乾隆五十一年游饑設廠施賑親自檢閱義學久圯田入於官鉞復營構振作盛於舊時

周士章字吳昉上元人崇禎己卯舉人工詩善書畫署如臯學教諭日與諸生課藝講學不間寒暑後遷山西石樓令

張大心字無放金壇人以明經司訓臯庠磊落高邁崇氣節重行誼士愛敬之

胡岳齡字又甲號石門寧國府涇縣人以選拔司教如臯善造士多所成就與諸生考道論文自手一編經夜不

倦性廉惠貧士不能執贄者恒周之嘗率士紳葺學宮建魁星樓修泮池捐俸不足繼以解橐一時上游無不以幹畧稱胡廣文者地方利弊必資商確而信用焉在官十有四年陞山東金鄉令弟子立去思碑以志教澤云

顧溥號瞻廬蘇州府長洲縣人以副貢授如臯教諭溥承家學淹博無所不通與諸生課藝力振先輩宗風尤工於詩好賓客觴詠歲入脣哺不足以給於用丰致清雅人擬之顧著作云

張鵬字南翼號嘯竹吳郡長洲人博學嗜古工詩司訓如臯歷十六年扶獎道義敦尚風雅不儲儋石而詠歌灑

然有古儒者吏隱風焉後秩滿去官臯人士感沐教澤因立遺愛祠祀之著有樂志園集嘯竹詩文若干卷

曹一士字謬庭松江青浦籍上海人雍正丙午舉人授如臯教諭按月校士一本先正鉢傳嘗云文章自古有定論區分雅俗殊井疆俗如箏笛互嘈雜雅爲琴瑟諧宮商士咸得所稟承甫一載計偕去遂捷南宮入史館授編修旋擢監察御史前後疏論皆益國體轉工科給事中歿於官臯士追慕祀遺愛祠

王之進字方魯無爲州人恩貢教諭如臯四年愛士甄材勤於課藝嘗以學田餘畝供邑書院膏火資不務肥私解任後囊橐蕭然著有易指提綱李杜詩評四耕堂文

集

任之鏞安徽舒城人選拔貢生任如臯教諭學宮頽敝頓重修一新縣額增廣生二十名後缺一名不知始於何年鏞詳請復原額後以卓異陞竹山令

譚聖道江寧縣歲貢選臯司訓博洽多聞手不釋卷與諸生設經論藝不及其他每課士題必先構程式刊刻文稿盛行江南

趙俊華亭縣選拔貢生任如臯教諭持己貞介率士端古在任十餘年始終如一同寅紳士無不敬且愛焉

蔡雙桂字閭齋吳江縣人副榜莅臯諭勤於課士不問外事乾隆五十年災疫請粟常平倉就講堂賑給寒士割

俸購田爲文士義塚

郭宗文浙江鄞縣人順治二年任典史時海寇圍城隨邑侯朱防守城獲保全五年隨陳公宿城防禦臯邑愈得安枕贊政歷有八年

李正銳順天大興人雍正八年典史任十四載邑人有李青天之譽北城外火災捐三萬錢拯被火窮民

薛維森河南孟縣人乾隆三十三年典史任潔已奉法不受請托夏月病藥餌無資以絺衣付質庫卒於任士民歛貲具棺衾備行資送之

盧廷桂字補堂直隸任邱人乾隆四十一年任石莊司巡檢四十五年圩民私開久禁雙水洞壩詳請查舊案復

禁永閉邑人頌之五十二年奉譴令諭濬通張黃港淤塞一千四百三十丈

陳元魁錦山人順治元年以戰功授狼山左營署掘港守備勦妖道王耀等有大功

孟三潤順治初千總借知縣朱邦政破土寇有功

王良駿崇明人乾隆四十一年任掘港營都司於署外堡內詳設藥局三間

黃振號海漁吳江籍崇明人乾隆四十九年任掘港營都閩嘗語將弁曰兵以衛民不以法度約束何以見朝廷衛民之至意越一載歲旱米價騰踊有司嚴禁出境振日飭各營戍兵獲有運米出洋卽加超擢由是價平未

幾陞福山營遊擊去之日軍民餞送攀轅擁號至不能行

如臯縣

十五終

如臯縣志卷十六

列傳一 人物 儒林 孝友 忠烈

天地有正氣人得天地正氣鼓盪流行經緯萬端蒼萃衆美其扶植綱常爲忠臣義士爲孝子順孫卽至艱難挫折終行其志不可抑損是臯邑中真足不朽者他若克自表見雖一材一藝亦錄其長以風示來茲志列傳

人物

魏陳矯字季弼廣陵東陽人也太守陳登辟爲功曹郡爲孫權所圍登令矯求救於曹操矯說操曰鄙郡雖小形便之國也若蒙救援使爲外藩則武聲遠震矣操奇矯欲留之矯辭曰本國倒懸故奔走告急縱無申胥之倣

敢忘宏演之義乎操乃赴救吳軍退操辟矯爲司空掾
歷官司徒卒諡貞侯

吳呂岱字定公少爲郡縣吏避亂南渡孫權召署錄事出
補餘姚長募精健千人平定會稽東冶五縣賊拜昭信
中郎將建安二十年督孫茂等十將從取長沙三郡克
之遷廬陵太守延康元年爲交州刺史討平桂陽滇陽
賊王金遷安南將軍假節封都鄉侯會交趾太守士燮
卒子徽逆命擊破之進封番禺侯岱既定交州復進討
九真斬獲以萬數進拜鎮南將軍黃龍三年武陵蠻獫
叛岱與太常潘濬共討定之嘉禾四年討平廬陵會稽
東冶南海諸賊廖式作亂零陵蒼梧鬱林諸郡騷擾岱

拜表輒行星夜兼路攻討一年郡縣悉平時年已八十
遷上大將軍拜大司馬岱清身奉公初在交州歷年不
餉家妻子困乏權聞加賜錢米布絹歲有常限年九十
六卒子凱嗣遺令殯以素棺疏布巾襦葬送之制務從
儉約凱皆奉行之墓在縣東南六十里

宋胡瑗字翼之少有氣節顯意經學兼通歷律之法景祐
初更定雅樂詔求知樂者范仲淹以瑗薦白衣對崇政
殿授試秘書省校書郎時年四十餘矣康定初元昊寇
邊仲淹經略陝西辟丹州推官後移密州觀察堆官丁
父憂舉其族之亡於遠者九喪歸葬服除遷保寧軍節
度使推官教授湖州召教授諸王宮病辭免以太子中

舍改殿中丞致仕皇祐間驛召會秘閣議樂除大理評事兼太常主簿辭不就歲餘授光祿寺丞國子監直講仍與議樂樂成改大理寺丞賜緋魚嘉祐元年遷太子中允天章閣侍講仍治太學既而疾不能朝以太常博士致仕就其子節度推官志康養於杭州四年六月六日卒於官舍年六十有七瑗孤進獨立拒遠權貴義以自信時承用周樂其聲高不合中和瑗初得對崇政殿及會秘閣議按周禮以正鐘律用上黨黍列爲九等纍其中者爲尺尺定而律成於是撤前樂而新之用於郊廟又令作皇祐新樂圖記布之天下蓋積二十年而後成居恒患隋唐以來仕進尚文詞而遺經業苟趨祿利

及教授蘇湖嚴條約以身先之雖大暑必公服終日以見諸生立經義治事二齋倡明體適用之學慶歷中興太學下湖州取其法著爲令學徒數千爲文章皆傳經義必以理勝信其師說敦尚行實出其門者皆循循雅飭塗覲之雖不識知其爲瑗弟子也後爲太學四方歸之庠舍不能容旁拓步軍營廣之禮部所得士瑗弟子十常居四五五經異論弟子記其說爲胡氏口義侍邇經講不以諱忌爲避旣疾上數遣中使就問安否去之日諸生皆詣闕乞留公卿祖送都門甚盛初在丹州建議更陳法治兵器開廢地爲營田募土人爲兵給錢使自市勁馬漸以代東兵之不任戰者雖軍校番酋亭長

廝役以事見輒訪備邊利害以佐大帥人翕然稱之瑗
事材而行篤卒艱勤以沒詔賻其家謚文昭後世稱安
定先生明嘉靖中從祀孔子廟庭

王觀字通叟惟熙兄惟清子也天姿英邁洽聞強記下筆
累千百言不加點綴而華藻燦然至和嘉祐間與從弟
觀從胡先生學於上庠聲稱藉甚高郵秦少游兩重之
比試開封府相繼爲第一觀中嘉祐二年第授單州團
練推官試秘書省校書郎遷大理寺丞知江都縣卒

王觀字明叟惟熙長子也嘉祐四年第進士熙寧初爲編
修三司令式刪定官不樂其職求潤州推官兩浙旱郡
遣吏視苗傷吏承監司風旨不敢多除稅觀受檄覆案

嘆曰旱勢如是民食已絕尙可責以賦耶請盡除之後
薦除司農寺主簿轉爲丞韓絳出穎昌辟簽書判官坐
在潤公誤免起爲太僕丞徙太常哲宗立呂公著范純
仁薦觀可大用擢右正言遷左司諫極論蔡確章惇韓
續張操朋邪害正章數十上相繼斥去又劾鼠呂惠卿
又疏將帥非其人者請易之茶鹽之害民者請革之青
苗之害乞盡罷之未幾拜侍御史進右諫議坐論尙書
右丞胡宗愈出知潤州加直龍圖閣知蘇州徙江淮發
運使入拜刑戶二部侍郎紹聖初以寶文閣直學士知
成都府兼兵馬鈐轄騎都尉封文水縣開國男食邑三
百戶成都地膏腴無閒田以葬觀索官地表爲墓田疏

治城渠民德之號王公渠坐元祐間論事輕重徙河陽
貶少府監分司南京又貶鼎州團練副使徽宗登極還
故職遷御史中丞與柄臣不協遂改翰林院學士力請
外以龍圖閣學士知潤州徙海州罷主管太平觀遂安
置臨江軍觀清修簡澹喜愠不形持正論始終再罷謫
不少變卒年六十八紹興初追復龍圖閣學士

王俊又字堯明觀從子也游學京師資用空乏或欲薦之
童貫拒不答林靈素設講席寶籙宮詔兩學選士問道
車駕將臨視推恩逮至講所去幃幄跬步內侍呼姓名
至再又但望幃致敬不出既罷皆爲之懼又處之恬然
以太學上舍選奏名列下徽宗親程其文擢爲第一賜

及第望見容貌甚偉大悅顧侍臣曰此朕所親擢也真
所謂俊又矣宜卽超用蔡京邀使來見曰一見我左右
史可立得又不往僅拜國子博士居二年乃得改太學
博士耶王謁先聖有司議諸生門迎又曰此豈可施於
人臣哉禮如見宰相足矣乃序立敦化堂下及王至猶
辭不敢當進吏部員外郎遷右司員外爲蔡京王黼所
惡以直秘閣知岳州卒年四十七又與李邴友善首建
正論於宣和間諸公卿稍知分別邪正兩人力也

查道字湛然其先歙之休寧人祖文徽南唐工部尙書父
元方宋初擢殿中侍御史知泉州卒於官道奉母渡江
居如阜性至孝母疾綿悒思鰥羹方冬不獲道泣禱於

如華縣志 卷之六 五
河鑿冰取之得鰈尺許以進母疾尋愈後母沒哀毀逾
節杖而後起端拱初舉進士解褐爲館陶尉曹彬鎮徐
州辟爲從事深被禮遇改興元觀察推官寇準薦其才
授著作佐郎淳化中蜀寇叛命通判遂州至道二年有
使兩川者以道治狀聞優詔加獎遷秘書丞徙知果州
時寇黨何彥忠等依險自固毅弓露刃詔諭之未下咸
請發兵殄之道曰彼以懼罪欲延命須與耳遂微服單
騎攜數卒直趨賊所賊驚悉持滿外嚮道神色自若踞
胡床坐諭以詔意或識之曰郡守仁者也是寧害我則
相率投兵請罪悉給券歸農驛奏璽書褒諭咸平四年
代歸賜緋魚出知寧州會舉賢良方正李宗諤以道名

聞拜左正言直史館未幾出爲西京轉運副使六年召
拜工部員外郎充度支副使賜金紫終龍圖閣待制道
純厚長者以文行稱於時與從兄秘書少監陶尤極友
愛自金陵破士族流離多貧困失職惟道兄弟盡力收
卹聚食常數十百人得任子恩皆與族人以少長爲先
後無親疏之間異姓亦分俸給之時其婚姻與人交情
分切至廢棄者待之愈厚縉紳間高之卒年六十四
丁傳字傳道孝子丁天錫長子初舉進士有司第其文爲
一郡進士之首孝友篤信義恂恂似不能言急人之急
惟恐後時擇士人之賢者延致門下使與子弟游故子
弟亦多好學以禮法自律邑令敦請爲鄉校諸生師尤

以道義經術爲己任邑之後進始知向學傳實倡之也
元祐七年卒年四十八

明 冒檜字友松洪武初起家明經耿介不阿以博學聞召
對稱旨時值天下甫定田賦不均檜侃侃直陳無所顧
忌上嘉納之授廣西監察御史揚郡同官者五人獨檜
正色立朝有理輪折檻之風

李素字叔文年二十七縣召爲吏素不肯就發憤習舉子
業甫三載以書中丞樂乙酉鄉試授訓導遷麻城教諭
歷任凡十八年訓課弟子寬嚴有則去後猶多見思

馬繼祖字崇功宏治庚戌進士初令博興寬仁敏決歲饑
力請當道發粟賑貸民賴全活擢留臺御史持重勵風

節時二臺長交訐繼祖劾免之臺中肅然留臺一時有
三馬御史人有德俊惡之謠而繼祖以德馬稱未幾忤
逆瑾疏養病歸博興祀名宦臯人祀之鄉賢繼祖居家
孝友持身簡重後進望之若嚴師多所成就冒叅議鸞
其高弟子也子紳舉於鄉曾孫洛成進士皆以禮世其
家至今名其里曰驄馬里

冒鸞字廷和年十六舉於鄉第進士授兵部武庫主事歷
員外郎郎中淮揚馬課故折徵時議徵馬鸞疏爭之得
免有中璫出守留京倚逆瑾勢奏請船馬皆溢故額鸞
裁其半陞福建左參議分守建寧平恕簡清一意與民
休息有聶賢者債弁也橫索民間苛軍士鸞引文法繩

之民有異母兄弟爭產訟久不決鸞諭以禮讓立解大茂山賊行掠遣人諭以禍福賊遂降旋以母老乞終養歸母卒以哀毀不起性澹薄夷雅口絕雌黃林居十有三年屏跡公府每危坐一室圖書左右不問戶以外事鄉里推重之歿祀鄉賢子諍臣以貢爲興業令剛直好風雅善隸書所交皆鉅公名士

馬紳字廷佩未冠游鄉校正德己卯舉於鄉六躋禮闈遂謁選授河南寶豐縣令邑大祲饑殍相望乃請當道發粟兼捐俸資多方賑濟全活者無算歲己亥上有事獻陵承檄營造行宮協濟鈞湘用綦浩繁調度有方民賴不擾在任四年知諸生陳策有孝行爲請旌表風俗爲

之返淳葺黌序而士氣丕變革苛斂而民困用蘇與人無阿比苟同卒以不能逢迎上官乞休致晚年自號松澗是爲鄉賢御史述齋公之子人咸稱述齋公爲有子云

李潔字崇義素曾孫年十二補諸生宏治壬戌以例貢授瑞安簿有武弁多占軍屯懷金夜謁潔峻却之盡出所占一軍稱神明潔自職事外凡可佐令長爲政者不遺餘力人多嫉焉拂衣歸優游林泉日以農圃自適惟政有不便於民則力論之不讓也卒年七十有八子二鎮字國靖寧陽丞聞父疾卽棄官歸錮字國容濱州吏日胡繼祖字敬修安定先生裔也正德間以貢知鉅野縣初

如皋縣志 卷十六
任事民有持賄乞解弟罪者撻之去有坐妻死而蒙非
辜者力釋之有撲殺大母抵上刑憲司欲曲貸其生繼
祖以解組爭之卒得請生平無警言孟行其姑母孀而
無依迎養終身日與二三同志講明正學於安定祠無
敢遏佚前徽卒年八十有二

錢藻字自文家貧力學成嘉靖己未進士授南禮部主事
進郎中出守廣信時有汰卒八千途肆剽掠當事議陷
以金藻第先聲厲兵以待卒無敢犯境者每折贖緩多
以粟置廩學社令貧士月得受粟數斗士咸戴之擢山
東副使備兵霸州會永清朱家口數壘而數潰藻出舍
虔禱中夜暴風雨漂一巨艦至遂因艦加堙堰成僉詫

爲神轉密雲兵備晉左叅政修築古北口諸塞蜿蜒七
百餘里累遷至湖廣左布政使以疾告歸垂一紀詔卽
家起用藻未上擢南太僕卿再遷光祿首請裁一切冗
費歲省不下萬緡晉順天府尹藻方加意釐剔而宿疾
已作竟卒於官年六十有六詔予祭葬

蘇愚字君明嘉靖壬戌進士授南刑部主事歷員外郎郎
中出僉閩憲備兵興泉轉廣東左叅議進副使尋進右
叅政俱備兵伸威除母服補叅政貴州備兵都清擢長
閩臬旋長江藩移粵西爲左伯遂請假歸堅卧不出愚
饒膽智多戡定功於興泉磔曾一本於伸威蕩朱良賈
賴元爵藍一清於都清招徠苗坪天漂百五十六寨陽

外臺縣志 卷之六
九
河韋昌金十有一寨臻剖橫坡九股六洞十二營百八十五寨既歸卻軌杜門不通一貴人書萬歷初興化李春芳以其邑苦潦欲分賦鄰境愚適入賀還昌言皇彫劫狀而減所分者過半臯舊苦邊衣一役中產立盡愚請於當路如旁縣例歲輸郡庫民到今受賜焉卒年七十有八祀鄉賢祠

丁鵬字良舉號南溟年二十五始奮發讀書鍵關下帷三年而業大就尋補諸生食餼嘉靖乙酉舉於鄉道經山東濟寧州州大司馬楊浩見鵬長身偉幹美鬚髯與言當世之務嶽嶽無少模稜奇之妻以女銓兗州別駕視河事會充豫決張秋沙灣又決滎陽東過開封歷睢陽

壞田廬百四十里河督盛應期大役丁夫五萬人鵬時分標開鑿自汴東南原出懷遠宿遷小浮橋溜溝等開濬以分下流之勢又濬汴西滎澤孫家渡等以殺上流之勢又修武城以南廢隄以防河之北流又於滕沛魚臺間開新河接留城沙口南北界兩河始安流無崩塞患歲省且萬計例歸主者鵬盡歸公家不私一錢主者銜之鵬艱不悅遂乞休時司馬浩且老鵬留濟寧終司馬之世偕其楊安人歸歸與曹相嚴怡冒士拔輩日以詩酒相往還年九十三終

沈躍國子生嘉靖間任德州判有盜晝騎而行劫賂捕者縱不問躍廉其狀責督捕者捕者不能匿竟寘於法有

如皇朝志 卷十六
太學生爲盜誣引躍力雪之兩臺交薦超擢行太僕寺
主簿太僕卿故臯令黎堯勳也馬政悉委於躍當得羨
千金分銖不私悉以簿正上黎嘆服晚歸江上環堵蕭
然菽菽自甘足跡不至城市時天寒有估客被酒渡江
遺囊金躍拊得之待其來驗實而歸之人服其德年至
九十餘

宗傳字習夫家貧嗜學夏夜常納兩足囊中以辟瘴膚之
患學成舉應天爲瞿文懿公所賞識七上公車不售乃
就選得蜀之邛州一意撫循不忍椎剝以市上譽坐考
功法當遷去之日猶出橐裝代貧民之逋賦者脫之桁
楊邛人尤德之嘗客郡中鄰家有鬻女遠方者母子相

持夜哭傳聞而哀之旦起昇以金使得贖焉時嘆爲長
者

殷暉字民望雙店人嘉靖間以貢爲四川行都司經歷興
化有二卒遠役蜀中抵所理投檄當告返俱以道暍病
暉察眉而語之曰若吾鄉人也道惡且遙毋遽往留之
外舍令人調護之竟後先歿暉收識其行李自爲棺斂
瘞之會直指使者至具陳其故請以回檄附御史郵筒
致興化御史稱暉長者如其請蜀多虎患教民編竹籬
銳其上至今賴焉歷九載不以孳從以老乞身歸挾二
卒行李及遺金特訪兩家子於興化昇之兩家子視其
父封識手迹宛然也

女皇縣志 卷之六
冒守愚字師顏富陽令鵬之曾孫也隆慶初選入成均累
舉不售授官得高陽縣縣介瀛鄭間九河之滙時苦衝
溺愚作隄與蠡接壤約蠡令共隄蠡令以蠡上游不欲
隄沮於郡太守行視日囑其下令以詰且休役愚謂郡
勒朝停役而吾夕成隄不可乎乃躬行河勵卒一夜而
築橫隄十里守詫異之隄成南抵蠡北達安州蜿蜒百
餘里沿隄樹柳三萬株遂成沃壤今稱冒公隄愚爲政
多所發摘以才調安肅安肅劇邑多豪貴中璫無得撓
愚法者而貴人多側目矣移守德慶治德慶如治安肅
民德之卒以安肅貴人修劾罷而高陽則生祠祀愚始
愚在高陽識孫相國承宗兄弟於髫年課之衙齋與其

子曰乾同祝席愚歸而相國兄弟皆頴脫去人尤服其
藻鑑云

郭師古字時用號中宇幼習舉子業家貧無書從人假讀
一過終身不忘尤善奇門遁甲之書身偉長有力善馳
射嘉靖末倭數內寇薄臯城師古爲當事謀畫輒奇中
萬歷丙子舉鄉試丁丑成進士留戶曹主政出督臨清
晉郎中時粵東土酋亂郡邑守令多書生不知兵本兵
薦師古知廣州到郡卽圖方畧徧詢山川險要躬親戰
陳由香山博羅沿至麗江俘斬數千人東粵悉平期年
丁父憂歸起補鞏昌時西事日迫全陝震動師古憂之
上安邊十五策朝廷聽之擢甘肅兵備鎮酒泉兼轄寧

夏平涼諸州事師古既當邊事益奮忠勇教練整飭壁壘一新由是敵不敢窺邊晉陝左叅政乃在廷大臣方主欵貢不樂其成邊功忌之中以他事罷歸著有百將傳籌邊紀畧八陣圖說諸書行世子嗣興以成均上舍授福州府佐進鴻臚連舉鄉飲大賓卒年八十七

余志昌字翔雲少游泮長入北雍謁選授合州判官賦繁訟劇人習詐偽甫至任一以清肅自矢合輸粟例以私量課入公量納官餘歸主粟者而胥吏得售其奸志昌悉釐正之有訟民何滿負屈持金私餽毅然叱去卒為平反緝盜獲趙松鞫賊得金珠無算志昌分毫無所取解組歸合人如失父母居林下以操行自勵為一邑楷

模子文美字質甫邑庠生有學行順治初邑旱荒盡出私蓄佐邑令陳秉燮賑濟全活甚眾

余大美字仲容未弱冠列經生籍再試異等受餼遂魁一經王思任海內名卿也讀其闈中牘亟賞稱奇爰寓書定交性既孝友天篤又儻易不羣顧好奕嗜杯杓遨遊里社一以坦易宅心未嘗以疾言惡色加人生平多所撰述不自存稿僅得徐于齋詩文若干卷其從孫瓊猶記送惠然歸杭詩云為惜六橋春欲盡還愁三徑草將蕪集中竟不載其散佚可知矣

劉灝字士曠生平多讀書又饒經濟才凡邑中利弊人所退避不敢言者灝侃侃言之無少忌萬歷丁酉科僅中

副榜人皆惜之後以貢初任商城訓導陞懷遠學教諭
冒起宗字宗起號嵩少萬歷戊午舉人崇禎元年進士授
行人五年考選授南考功司主事陞郎中七年出爲充
西僉事監軍河上鼓勵將士賊不敢一騎潛渡久之聞
父訃歸服闋備兵嶺西以卓異聞旋調湖南衡永叅議
會張獻忠破襄陽再調襄陽監軍獨與左良玉收合餘
燼歷一歲以城守招撫功被上賞量調寶慶卽拂衣歸
竟以嶺西舊事坐降級十七年起副使督上江漕儲尋
乞休卒著拙存堂詩文經質史拈擬陶集杜數十種皆
爲世所重子襄褒別有傳

范志易字希宣以諸生入成均偕冒愈昌遊白下與吳國
倫屠隆輩相友善愈昌中讒去志易謁大司馬顧養謙
白其寃顧稱其誼略與申包胥同年五十謁選爲典客
未幾解組歸闕西園課二子廷瑞廷瓚其中瑞瓚隨補
諸生皆爲知名士瓚沉潛好學老而不倦年六十猶應
舉子試詩法錢劉無纖靡之習處友以誠宗黨以義倣
文正公制置義田以贍族之貧者父子皆有集行世瑞
別有傳

馬應禎進士洛之父也故事登科之家縣大夫於賓興外
常浮溢百餘金大都斂諸里甲禎以爲非禮一切謝卻
洛官重慶時奉禎教守官行已一意寬和雖蹭蹬仕路
恬然自安退居鄉曲人驟遇之不識爲貴人也少年後

進多折行輩與之游時稱長者

許邦儁字西白賦性溫厚與物無忤凡七八棘闈俱不售
萬歷末以增廣生入北雍爲成均上舍謁選授布政司
理問值逆璫用事時政日非遂拂衣歸尋卒妻陳氏故
明忠烈陳輔堯妹也孀居三十年栢舟自矢課子義方
有陶母風子納陛別有傳

吳一驥字伯顧夙負文名應諸生試輒第一常設教西河
一時從遊者數十人驥於四子書別有會心矢口皆妙
義聞者解頤崇禎末年由選貢授麻陽縣令懸魚瘞鹿
比解組歸猶然一貧生時年七十五仍以講學爲糊口
計死之日一室罄懸門人營葬焉其清風高節可想見

矣

郜璉字方壺歷仕台州府經歷解綬歸舉鄉飲大賓性嗜
山水五岳親歷其三雅善鼓琴時稱廣陵散復在人間
尤精於繪事嘗寫芭蕉傳至日本海外珍之年八十三
卒子瑞麟字昭伯文章聲氣籍籍有名

國朝范可裕字啟之號景衛文正十八世孫先世自吳徒臯
代有聞人祖源攻苦早世祖母叢孺人苦節五十餘年
爲女中嚴師父希曾官粵西丁叢孺人艱歸可裕萬里
往迎於風江迅疾時轉行追值若有鬼神默接者明季
里中疫死者相藉施棺貯靈威觀聽取之康熙庚戌年
下河饑民乞食於居宅炊糜以食百人不數日而饑民

愈眾乃分食於諸子家至二千餘人啜粥之聲達於垣外行之數月不倦比至秋勸令歸農計口給錢以去捐建專祠祀文正公春秋俎豆自此始仿義莊遺制悉以所有田九百畝捐作義莊以夏麥給族之貧者而秋租則儲爲合族緩急之用勒石宗祠垂爲恒規晚創甘露菴朝夕梵誦其中以子端貴誥封奉政大夫屢膺鄉飲大賓壽臻八十有七五子十七孫曾元以下數十百人其善行詳載司徒梁清標行狀中

冒襄字辟疆明憲副起宗子以前壬午副舉特授司理官親老不仕後累膺徵辟卒皆辭免邑有樸踞城南濠就樸架亭與鶴鶴同棲遂自號巢民少遊董文敏門文敏

序其十四歲時詩方之王子安旣長才益颺湧詞章及行草書流傳海內家故饒亭館之勝好交遊四方賓至如歸聯鑣方軌殆無虛日諸先達及前後館閣臺省下逮方伎隱逸縑羽之倫來未嘗不留留未嘗輒去去亦未嘗不復來生平大節挺然父起宗嘗犯權要忌抑陷襄陽監軍爲必死地襄獨走京師泣血上書請命卒得改調熹廟中六君子輩死璫禍懷宗反正被優錄已而璫燄復熾修故郟欲甘心焉襄聯難陰諸孤結社金陵相抗卽蹈危險不顧晚年却掃家居年八十猶作擘窠大書體勢益媚又三年卒其他事具見於名蹟藝文脈卹各類中子嘉穗丹書別有傳

丁允齡字孩修少有才名善談論磊落不羣以文章受知吳宏功王蚪生兩縣令期許遠大屢以數額僅由明經授來安訓導繼補涇縣陞宜興教諭所刻三縣修學錄課士草皆有功聖門挂冠歸里以詩書教其子孫年八十七卒

叢中蘊字含英六歲喪母哭甚哀至絕粒數日事父能委曲承歡待異母弟六人尤極友愛產擇其礪僕引其老器用取其朽敗有薛包遺意生而穎慧博聞強記爲文下筆立就年十二游泮有聲丁酉方弱冠領鄉薦臨軒覆試中蘊以敏贍拔置前茅人爭榮之居家惟左右定省暇則手一編自娛及謁選得淮安府教授至任卽捐

貲修葺學宮日與諸生講道論文不倦遇貧士分俸給之以疾卒於官淮人士皆哭之子芳舒讀書太學不墮先業云

范廷瑞字公茂擅文名海內道符契合郵筒絡繹戶外屢常滿而至性純篤庭除里閭無間言幼嘗受業章海瀛章以諸生伶俜膳之終身不衰與彭際明友善際明博學多聞憐其死而爲之殯師友古道爲鄉俗先爲諸生十五年去之太學又數年聲華不減而試卒不售治笏圃一區肆志其間陳仲醇寓詩諷之曰曾聞小范能輕世不學王裴自埽除陳寒山亦云五湖自有家風在其奈元龍氣未除侍御凌駟簡命中州辟爲監紀通省兵

馬分理部郡疏云學通經術才擅勛勳大堪奮發懋猷
佐平梟獍命下破產募死士以赴而凌殉節死於是益
感憤自放長嘯終日逾年疽發仰而嘆曰得從凌先生
於九泉復何憾遂瞑董思白嘗語人曰范子翩翩卓然
名品王季重陳古則曰廣陵宗方城後一人而已

石函玉字振響明鄉飲者賓東疇之少子東疇有碩德孝
友恭儉耄年舉鄉飲大賓舉八子教以義方俱讀書能
文名列庠序時人有八士之稱惟函玉尤穎異讀書一
日十數行十五入泮踰年食餼左國史漢諸子百家以
及天文性理無不窮微盡奧與吳白耳余仲容相爲倚
重試冠軍者三下帷攻苦積勞成疾年未四十而歿子

璜別有傳

朱鳳台字慎人靖邑鄉賢凝和之第三子也順治丁亥第
進士謁選得直隸阜平縣移浙江開化政績詳載治開
錄行取晉秩兵部主事請終養遂不復仕進自號退思
子庚子載書家如臯遵功令編藉安定鄉任土納賦與
士著無異生平佩服聖賢經傳捐貲修學宮東西兩坊
倡建育嬰堂置義田義塚三爲鄉飲大賓所刻有四書
解義退思軒諸書歿於靖邑崇祀鄉賢

吳世標字公建號嶰谷明天啟丁卯與許忠愍若魯冒徵
君辟疆同受知於學使陳公遂相友善癸酉忠愍魁南
國標已售復落癸未郡守開社廣陵拔標第一名翔江

淮構別業積書數萬卷著述等身丁卯邑令董廷榮舉鄉飲賓卒年八十有二子奎光斐彩霈膏孫棫芄文行并重於鄉

吳師洛字道川性澹泊寡營不事紛華讀書外無他好幼齡遊泮康熙壬子以春秋魁南國自登賢書後門無雜客架有奇書教授生徒鄉黨咸服其高未幾卒人共惜之

范永字孝標恩薦明經性至孝年十二失恃哀毀如成人事父至白首日侍寢膳不離左右兄弟友愛邑中有義舉力行不倦臯邑賦役舊有廂里長名色十年一役中產立破永集士民白當事官收吏解積弊頓除創育嬰

社活嬰兒甚衆族有貧乏者婚喪取給焉流民入境必請於邑宰捐粟煮糜賑之邑中有疾病死亡窮困無告者立同善會施棺以斂之著有改亭日錄歿祀鄉賢以子大本貴贈徵仕郎中書科中書舍人

許嗣隆字山濤號文穆神彩疏秀九齡通五經學使者得其卷吟諷迴環遂補博士弟子員壬子選貢成均乙卯鄉薦時母黃安人清羸善病嗣隆憂之行不能正履壬戌魁春宮選庶常甲子辭南巡賦

上嘉賞之擢檢討充

廷試讀卷官編緝

內廷書籍文選諸書

特賜幣帛恩禮渥焉已巳聞母訃絕粒三日三年不與讌會癸酉

補原職典試雲南所得士皆一時賢俊擢左春坊左中
允兼翰林院編修晉侍講已邁疾憂親柩未厝力請告
歸出都之日圖書數輶而已著孟晉堂集金臺集使滇
記畧諸書

余瓊字文賓修髯便腹每棲身而學嘗曰烏有鳳魚有龍
草有芝泉有醴斯皆嘉瑞出應昌期瓊幸處士倫畧識
故事烏可使江臯文獻蕪穢不治因上書有司請排纂
邑乘起萬歷戊午訖康熙癸亥六十有六年紀載賢士
大夫德善功烈大旨畧備云

姜世寬字君裕父振所晚年病痺侍奉湯藥扶持起卧三
月不解帶已析箸諸昆或吐茹肥瘠裕怡然不與較惟
請於宗老人曰祖宅傳且三百年未嘗易姓請畀子爲
棲息地凡喪葬之費竭力經營不以諉諸昆康熙間大
饑捐穀賑之邑令趙宏化以善蓋一鄉旌之子開緒字
擴原號而膺年十五卽代父綜家政母鄒淑人暮年病
瘕開緒晝夜撫摩每春日和煦背負淑人游藥欄花徑
間得一味甘必懷之以奉耄年爲子孫曾元述先人笑
語嗜好猶泣下不能止族有以事廢產者經營籌畫卒
使得存鄉有憤爭者得一言立解其至誠足動人也以
子穎新貴封直隸按察使贈父世寬亦如其官

范育字公和永之弟砥行立名惠和篤於鄉里歿後里人

思之朱廷宁蔣世琦吳文昱沈領數百人詣縣門稱育
視躬直諒立品真醇孝事二親不懈存沒苞翼諸季弗
替友恭居鄉則弭災拯患處世常利物濟人請祀於鄉
以勵末俗已得請於

朝知縣周鼎鑑教諭顧溥訓導張鵬奉主入鄉賢祠二仲致祭

焉

石巒字含銳工舉子業得嘉魚遺法兼習詩古文辭小楷
出入鍾王臯中學者以巒爲稱首縣尹盧縉聘修縣志
以明經終

許納陞字元錫清才迅發爲學林領袖臯志自呂公原創
藁後六十餘年未續納陞同丁確石巒余瓊諸人訪羅

舊失排纂掇拾畧備一邑之掌故得藉重修大有功也
平生著述甚富子瑤邑諸生

范立字斯立豐軀偉幹聲如華鐘治生產綜理精密意又
豁如也兄弟五人出則同車入則共案先是伯兄端令
儀封署中凡百所需咄嗟卽辦仲兄永虛悻不寐常共
卧起手握其腕俾酣寢父可裕常憂本宗食指數千婚
嫁喪葬義莊菽麥不敷用立紹承父志捐田九百畝歲
入穀千四百石著規勒石鄉人空乏者寒子以襦饑子
以穀分甲乙籤終則又始歲費千金長子大成任汀州
同知擢瑞州知府公餘退食必以清白訓至鞠命盜獄
尤丁寧垂戒活一囚則喜形於色封奉政大夫晉階中

憲大夫壽八十有八子孫羣從紆青紫者十九人

石與立字句餘讀書嗜古弱冠補博士弟子員己亥歲薦以明經謁選得州司馬奉母終養不樂仕進嘗營葬祖父母合羣從兄弟鳩千餘緡爲費旣葬潛以所鳩金返之蓋恥己獨爲善故先諸弟又知諸弟艱於物力故獨任之也族本繁庶有婚嫁無措及鰥寡無告者皆周之晚年獨建宗祠春秋祭祀歲時伏臘祭畢族人燕饗相與言孝言慈言敬一族咸化爲和睦邑中均差賑饑修學立育嬰社葺文峯閣諸大興革皆賴一言而人悅服尤先身任之不辭其天性好善趨義類如此子四爲基候選訓導爲城候選州同爲墀候選學正以爲壘貴贈

奉直大夫澧州知州

胡邦棟字梁公三歲而孤七歲時母王病革以諸子屬家人而不及棟家人異之母泣曰若少年一如成人吾無慮也

國初棟年十五以寇盜尙有餘氛留意韜鈴騎射而於河漕

屯田水利諸事無不講求已專攻舉子業以諸生應例入成均自知早衰不復爲世用築一室於城隅之龍游河終日默坐而已生平恬靜寡欲雖間治生產期於俯仰有資而止然好行其德與里人范永等聯同善會創育嬰堂收乳嬰兒歲數百計歲歉則散粟以周貧乏疫則施藥石寒則施絮衣死無以斂則畀之棺產不過中

人而傾橐不少懈卒之日無餘資焉以子香山貴贈文
林郎翰林院庶吉士

石與德字克峻襟度灑然汪洋坦易人莫窺其際飲酒一
石不醉爲文章自抒已見上下千載不隨人俯仰旣不
遇卽放浪東南山水間興之所至窮日夜不倦子爲崧
令雲中時隨大兵駐塞上與德從兩長鬚策馬徧覽諸
阨塞亭障私有所論著多中機要爲諸生時嘗葺學宮
與同人肄業修族譜置祠田與邑前輩冒巢民急友人
之難論者題之年六十有八卒以子爲崧貴贈戶部郎
姜迂譽字子髦號碧滋姿儀豐偉家多藏書博通今古康
熙初吳藩阻聲教慨然習騎射中壬子副車偕同邑冒

起蒙胡邦棟治學宮射圃率鄉茂材習射其間天性長
厚喜怒不形於色課子極嚴延名師於家首頂夏楚臨
而進之子任脩承義方之訓中康熙庚子京兆試明年
成進士第三授庶常孫恭壽舉乾隆辛酉江南第五皆
譽教也

許其晉字晝初號蕃錫幼失怙恃父母忌辰淚泫泫下孺
慕之誠終身不衰康熙六年丁未割產三百餘金爲族
祭田忠愍祠日久荒圯出已資葺而廓之族人德溥以
赴義死藁瘞揚州之荒邱其晉資其後人扶櫬歸改葬
焉倡建育嬰堂捐田以供乳哺費約聯事施措賑饑名
曰同善會官湖藩理問精勤幹達有吏屬對簿中丞檄

其晉雜治之囚夜輸五百金乞哀其晉正色叱之却其
金左駿無實卒爲平反辰州苗叛其晉奉檄單騎往諭
之蠻人流涕受命邊釁以弭告休歸里二十餘年杜門
絕干請邑令敬之舉鄉飲大賓

徐勅字而強夙負雅藻幼飲香名旣長與朱慎人鳳台金
閻齋儆共遊處朱嘗稱其詩如絕壑丹霞煥然流炤激
楚搖寒沁人心骨以明經貳隴州會王輔臣驛騷關陝
突犯孤城知州翁世庸與僚屬皆陷賊中勅獨乘間馳
數百里至定西大將軍營密陳機務大將軍表其忠義
於

朝已恢復隴州勅以疾解官隴父老閻琳等泣請曰哀鴻滿野

流亡未復非使君無以活州民勅不得已留病益甚請
告歸初勅父啟元病勅昕夕禱於帝父愈遂改建玉皇
閣告成之日梁間生靈芝一本鄉人瞻歎共指爲孝徵
云以孫建构貴贈資政大夫

沙鼎字元調邑諸生以貢入成均遊徐東海韓長洲門就
京兆試落第入貲除建昌通判姜西溟贈之詩曰宏才
非半刺雅韻足千春蓋深惜之也建昌僻處山陬民樸
而事簡時具酒饌致諸生朋校經義詩古文詞近郡多
名山若麻源華子岡諸勝時挾琴酒觴詠其間平生癖
好點蒼山石比還輦數十篋從人咸疑之發之皆石也
梅耦長曰君顛不減米老矣已督通省漕運往返萬餘

如皋縣志 卷十六
里會歲除廉使劉廷機副使韓象起咸以詩酒推公獻
歲各合樂張宴賦詩角射鼎忽疾六日而歿著有拂塵
集盱江遺稿子六人長漢鯉綽有父風康熙乙酉丙戌
間捐穀賑乏邑令周振菴稱其賢次漢菴別有傳
丁其珍字天聘始在髫髻温粹而莊父間齋篤愛之曰是
兒必亢吾宗十歲六經盡通未冠遊庠旋食餼間齋好
士珍歲釀百餘斛治饌具丈人行咸嘖嘖稱孝謹善養
云間齋疾珍不解衣兩逾月一七一酌必嘗而進之髮
爲之白兩親沒哀毀骨立不御酒肉者三年將吉祭於
城堙東南隅庀材飭工闢榛蕪而宮之環蒔花竹設主
安靈曰不忍吾親一日未有所歸也又推間齋以上歷

世宗祔聚而祀焉授常州司訓未出仕而卒以子曾貴
贈承德郎

冒起宏字若水國學性孝友弟不事生產分食解衣贍其
乏至再四不倦倡建宗祠置祭田以敦宗睦族子與嘉
候選州同性誠謹言笑不苟好施子值歲祲賑費不貲
孫有萊有慶皆候選州判有筠國學有萊事孀母以孝
聞

冒起蒙字蒙求少孤母李教之成立領武鄉薦性至孝爲
安溪李相國所器重推守戎以親老辭斥貲建文廟宮
牆復學前射圃又創立宗祠修家乘置祭田心力兼勞
者二十年族人奉其良法屢舉賓筵不赴年八十五卒

子與恒與學與時與恒爲邑諸生年九十餘生平無遺行熟臯中掌故與學入成均與時授佐牧皆讀書通大義以孝友世其家學孫詒補博士弟子員多著述

朱廷宇字式屏號惺園篤志闇修精研理學年十三補博士弟子員康熙壬午捷北闈成進士時父鳳台年逾八秩急圖養志南旋父卒釋服補中書轉戶部主事又念生母師氏年已老遂解組歸友于兄弟克嗣前徽吉水李督學以孝友可嘉旌之他如敬宗收族任郵睦嫻撫故交顏佳允之遺孤濟同鄉徐葉二生於顛厄迄今人猶稱之雖判薇省遷農部綽有政績而孝養不遑究未罄致澤之鴻略云子學潛候選司訓別有傳次之瀚光

祿典簿

朱廷宮字中治號省齋駕部鄉賢鳳台子五歲隨父遷臯髻髻有成人度鳳台舊宅在驥江不時往來休沐其間廷宮奉母師宜人居臯晨昏溫清因心孝愛協禮式人咸稱之十四舉茂才食餼上庠試輒冠軍辛酉歲薦入京兆試以麟經額限一卷馳而復蹶枋文者多惋惜焉益刻苦下帷日夕與兄廷宇相師友研讀時或達旦遂病怯卒生平敦倫紀尙氣謹外和而內嚴遇事可否立決未嘗一投足公府書史外無他嗜於城南葺惜字菴拾片紙隻字焚之施漏澤園修橋梁施棺槨鄉里推爲長者著有四書文西聲閣詩集

胡香山字夢白號成村初生時父邦棟夢人抱子語曰此白香山也因名焉十一歲舉秀才十三應省試即膺薦逾歲父病潛刲股以進歿毀瘠甚鄉人詣有司請旌學使高裔曰髫年子衿至性純孝世所難也爲書其廬以表焉年二十二遊太學日益有名尋以母疾馳歸讀書家塾二十餘年四方名士至者如歸雍正癸卯成進士授庶常充一統志纂修官綜覈今古體要大備擢編修戊申改河南道監察御史協理浙江道事已復歸館職總理內務府咸安宮學政先是

上重其選桐城張相國特薦香山

上諭曰張廷玉薦爾人品學問朕亦素知爾往造就人才不惟教

讀書也香山承

命更定條規闡明經學得觀保李質穎等二十餘人甲寅以疾謝職時方閣學苞總裁一統志纂本悉香山核正白鄂西林張桐城二相國致書徵之不出卒於家子申錫申穀申翼申穀與修一統志

姜穎新字文庸號至山十二歲受知吉水李公旋餼於庠庚子以禮經魁南省癸卯成進士以練習掌故分纂大清會典授編修丙午改補刑科給事中數月薦劾稱

旨丁未分巡天津河道明年調通永河道巡行經畫不費帑不擾民時怡賢親王總理水利亟薦剡之擢直隸按察使矜釋疑獄數十案捕奸猾劉金剛等數十人又獻縣紀田

升雄於賞爲家奴所訟部以狀聞於

朝降

丙勅使鞫之廼力陳本案狀無可坐罪請俟訪劾
賜奏摺有事得入告已赴獻審鞫援情按律稱

上意紀田升卒得保有家室念諸囚之待訊者夏曝冬僵狼籍堪
閔構屋宇俾偃息其中病則時醫藥死則備棺殮如是
者終任無間好培獎士類於署之西偏建觀善堂多築
齋舍爲諸生下帷地饘粥膏火悉出之清俸任河道時
兼攝漕政課稅訪商民之利病而籌之少有贏餘悉輸
之少府壬子仲春將有江安藩伯之命以兩親皆八旬
乞歸養鄉里榮之

范元龍字雲生生而醇厚自束髮受書卽務求大指屬文
華實並茂澤於經術其學以循理治氣爲主與復社諸
君子往復辨析矢志復古不應學使者試隱居西溪卒
年八十有三撰明鑑錄四卷西溪遺稿三卷子燕燾兼
樵燾有傳

石麟祥字公發性淳樸能竭力事父母昆季二人怡怡雍
雍無間言而制行嚴正遇事慷慨每建一議輒使人折
服邑中建

皇亭修學校葺文峯閣諸事多爲鄉里倡率鄉人賴之早歲遊庠
而不以能文章自命耄年猶嗜學不倦至今追述耆德
者多欽仰云

顧謙字天益白蒲人喜藏書蒲上文士知購皮往籍自謙始母許忠愍女謙父士掄卒許矢志守貞後以哭忠愍死忠孝之教蓋有自也爲諸生六十年衣冠古樸閉戶繙經白髮抄書寒暑不輟手錄經史子集滿巨麓蠅頭細書楷法端正曾無脫畫惜身後散失殆盡矣

吳宗字萬時白蒲鎮人未冠補弟子員執親喪盡哀盡禮餼於庠而屢躓場屋兩兄早逝撫遺孤如己子其族世居於蒲約諸昆從營置寢室以妥先靈春秋肅祀事爲敦本收族計其子弟有能文章者約聚課於堂東西聯坐如號舍文成嚴定甲乙復留飲以勉之好爲詩著有研北詩存春坊嚴江宋丹林爲序而刊行之以子翀贈

文林郎武清縣知縣

蘇廷珍字席遜少時讀書聰穎魁梧奇偉甲子領武鄉薦越十年成進士以養母歸或勸之仕珍曰古人一日養不以三公易又何求乎朝夕承歡克盡子職前後縣尹以鄉飲聘不應卒於家子宏學

范大任字敬承生平多善舉經理本族義莊條畫井然族人稱其德焉先是臯有育嬰堂資用若不敷大任益其數足於用又置田爲嬰兒塚

許大儒字董傳宮詹嗣隆仲子也甫冠遊泮隨父宦京師以附貢入成均教習旗學需次教諭生平慷慨重然諾端方孝友鄉里稱之好施與傾囊紓人於倉卒無幾微

如東縣志 卷十一
吝色以故家中不中貴性恬沒遨遊名山大川時偕王方若查聲山杜茶村暨里中冒巢民石樊山諸名宿唱和著述極富刻有粵遊草二卷

繆偉望字賡期明旌二賢之裔遊庠屢困膺歲薦父松岩賑饑施藥建寺育嬰望與兄偉臣殫精繼善無憾弟偉業卧疾託治家事五載歿仍完繕歸孤曹令樞禮延賑饑獎曰廉操可風晚年構廬墓旁自適壽登八十子多出宰食餼孫皆文學著名著雪梅遺稿四卷

叢澐字雲起性敏悟未冠入膠庠屢躋棘闈以明經授望江縣教諭至任卽捐貲倡葺黌序校士一遵安定遺範貧不能學者調恤曲成之上憲稔澐文行兩委攝縣篆廉平人不敢干以私俸滿陞補知縣多士德之爲勒石以誌不忘緣親老不仕盡心甘旨謝絕人事二十餘年不以片刺謁長吏醇謹溫厚與物無忤人共推爲碩德云

徐宏緒字克繩號含山父勅官隴州宏緒侍祖家居夕膳晨饑得祖權而寬父懷暇輒攻苦讀書甫冠爲博士弟子員己父祖相繼逝哀毀骨立杖而後起先是母劉早卒宏緒在襁褓中不及見及長思慕不置營墓啟窆一痛欲絕人咸以孝稱之以明經爲當塗學博摩厲士習刊天門課士錄以爲式擢安仁令禁民間鬻妻溺女犯輒置之法而又多出銀粟以安全之邑有蕭公隄日久

嚙蝕宏緒節縮俸入復治故道一如昔籠石堤水法會山水暴漲穿堞亟鳴鉦招民登署內山以避之活千餘人卽躬詣村落瘞死慰傷先發粟賑卹然後繪圖以請民咸感泣於蕭公祠左建徐公祠祀焉令安仁六載撫字緩徵勸農平糶如漢循吏大吏交章薦會得遷因積勞沉疴力請歸去之日民間攜妻負女泣曰皆徐公賜也歸里偕弟宏成奉繼母沈以孝聞先是父勅遺命創鬱羅閣繪椽藻廬若遊清都解組後嘯咏其中蕭然有出塵之想卒於家以子建杓貴贈資政大夫

張槎字漢乘號秋溟清貧有操嗜古力學幼失恃奉祖母吳鄉居以孝謹稱甫食餼侍父祚於朝城登闕里陟泰

岱纂述摹抄積而成帙已教習成均一時鉅卿莫不器重引進之丁父憂扶櫬南歸時大疫同路死者相枕籍率焚尸河干槎長髮黥面辛苦萬狀六閱月得抵里無所侵焉服闋出遊自燕歷豫浮江漢泛洞庭躋祝融昔賢遺蹟必手摩口紀雖停車待渡僕御催促弗恤也除亳州學正以老不就年八十卒

范大英字咸音號肥山邑增生誥封奉政大夫立第四子也侍母任孺人疾刲股以進母歔血數升母旣葬苦塊飭粥廬墓側三年及父沒亦如之遂屏迹不入城市後學博顧溥過其故地愴然流涕爲題曰范子廬墓處范燾字時巖祖廷瑞十歲隨父居溪上溪距城二十里日

入城就外傅力學讀書常竟夜不輟倦欲睡以頭觸柱
年二十學成三十始一應提學試輒第一歲科試又屢
冠軍餼於庠四方從遊者甚夥讀書舊時別業做廬數
十椽荒徑數百武晝無人聲夜聞鬼哭雖饑寒迫切所
弗恤也自吟有三旬曾九食之句其苦志如此事親務
先意承志家雖貧未嘗絕甘旨父嗜木嗜食豬肺父歿
遂終身不忍食肺居平以館穀自給有餘則以與兄弟
之貧者以節儉故晚復先人產數百畝喜閉戶著書然
成卽自焚其稿惟講天人性命之旨及說太極西銘諸
解門人錄而藏之名曰慎餘編年七十二以次應貢病
卒子承宣登士戊進士

李四載字奠九篤行嗜學與白蒲姜退耕同受業於撫軍
張清恪公讀書滄浪亭聲振省會戊子辛卯兩薦不售
名輩多憇息北游因母老不忍就道母促之再以秦州
監中京兆試旋歸終養庚戌上公車卒於京著有餘閒
堂詩古文集子筠臯明經增灼臯庠生

范大本字心淵號缺菴以諸生食餼貢入成均官中書科
中書毘陵徐公子避難相投爲之謀饗殮安室家俾處
異地如故土邑中均差一法倡自大本父改亭本承父
志每邑令下車詳陳利弊懇其母惑浮言堅行良法比
戶盡受其賜崇川陳某偕行之京適逢恩例貸金授職
及任廣西巡檢客死櫬歸大本深爲憐憫絕不責償舊

如皋縣志 卷十一
令趙丁艱缺課首倡捐助得疾垂危又代備後事守汛
婁溽暑驟亡買棺速斂妻子自秦千里來謝臨別厚遺
之其重義輕財生死勿渝如此居官三載以母老乞歸
咸祖餞都外賦詩以贈有極知無計留君住更有何人
似此回之句蓋紀實云

孫乾字惕菴幼失怙奉母至孝以諸生入成均需次司訓
因母老不仕性甘澹泊好學不倦割書室爲斗姥宮爲
母祈壽日與張孺子范栗園趙左廉諸耆舊習靜其中
咏酬不輟士林企慕焉

黃絜字矩平邑諸生少有文名慷慨好義嘗斥腴產以贖
其族又置義田瘞朽骨施楫殮遺骸鄉里義之謂有文
正遺風焉雍正三年通州改直隸初創試院院東阻河
水入試士多不便絜捐金建利水橋過者便焉又捐社
倉積穀三百石晚年益樂善不倦母年九十九歲白頭
膝下無異孺子年登九十

芻粟帛二次給八品服以榮之

冒兆禧字介菴六歲失怙哀毀幾絕母孀居好靜爲築不
波齋以養志侍奉無懈容平生尙節義崇禮讓嘗延吳
文昱於家教授諸子歷三十年久而敬之中子廷駒喜
讀書杜門習靜教子弟躬行之學廷駒謹言行慎交與
截取州判以事親不赴季子廷騏有至性以哭父卒
石爲崧字五遠以諸生貢成均屢困棘闈鬱鬱不得志束

如歸縣志 卷十一
裝出遊足跡所至山川雲物形諸歌詠猶以未及遍遊
五嶽爲憾兄爲崧詩有有弟同余癖常懷五嶽遊之句
晚年閉戶吟嘯時拈丹青有宋元人遺意高堂色養兄
弟友愛出自性成卒之日早起謂家人曰速治具吾將
逝矣一笑而終

石爲崑字五瀛少與仲兄爲崧同遊鄉校屢躋省試循例
入成均伯兄爲崧官靈邱隨禁旅征噶爾旦効力軍前
督運糧芻動合程度論功議敘州判卽用丁內艱歸服
除念父老不樂仕進潔白之養克躬盡之性耽尊鑿圖
史甄別真贋有米顛風友于之愛白首尤篤推宅與兄
移居河西駕畧約通之里人名爲雁橋

陳謙字自牧舉戊子武鄉薦博學工詩文與高贊兩深范
越山捷友善嘗寫梅題贈越山云春夢婆呼蘇老大清
宵人遇阮狂徒一時傳誦姪某貧從孫某瞽皆割田贍
之老友張茗柯年八十餘使諸子迎養於家茗柯卒爲
梓其詩以傳焉

冒勗字子懋垂髫有識度父寰埠曰此兒駒齒未生已隱
龍文十餘歲三試皆冠其言補博士弟子員方試海陵
過登仙橋聞父訃痛哭墜橋下叔父老勗迎養之常念
族姓蕃衍宗法未明遂偕族之同志創宗祠置祀田修
譜牒迄今烝嘗勿替海陵蔡孕琦勗友也以仇家誣搆
陷大辟女蕙上書訟父寃勗傾產飲助之

聖祖南巡蕙涉水上書孕琦竟得釋人皆歎文之孝而稱勗之義焉卒年八十有五子天錫登丁酉武鄉薦孫國柱恩貢生

沙潛龍字躍其號吟菴父鍾璘積善裕後鄉里稱古君子潛龍克廣先猷家聲丕振生平輕貨財重然諾慷慨好施子交結當代名賢門多長者車轍邑有興革縣大夫虛懷咨詢多所擘畫雍正十年倡修學宮鳩工庀材不遺餘力士林籟請於學使張宗伯廷璐為撰文紀績勒石學中且表其廬曰義重鄉閭子既仕潛龍益謙退築別墅於南郊以樂餘年州牧胡廷琦贈以端方孝友縣尹彭履仁贈以砥礪廉隅僉以為非虛譽云

鄭臨字遠度幼受業海陵唐石郊又負笈就白門讀書好學遂占籍舉秀才試有司必茂等選行精嚴錄學者比於艾評與筆硯之伍相切劘為制藝旁及詩古文詞靡不造微惜弗得一當以少展其畧籍鑿儀參軍需次家居閉戶繙經彌敦夙好日邀近局欵密流連茗椀酒鐺磨韻射覆往往達曙著述尺餘手自吟削分體八卷藏於家

沈宗聃字西山幼入膠庠試輒冠軍食餼二十餘年與里中胡夢白姜退耕文名相埒晚年絕意進取同胡夢白議創崇正書院隸洲田五百餘畝以充膏火已恐田入不足復自割百畝益之著有綠天書屋詩集松園文集

子全道全遜全達全遇以子全道貴贈儒林郎

顧遠字雲聲白蒲人孝友嚴重無遽言忤色家庭間雍雍如也生子九人皆克樹立以子之瑞官鹽曹贈批驗使蘇宏學字景瞻入北雍需次州牧端慤周慎無故不離親左右從弟敏學幼孤甫授室而逝兩世孀居榮榮在疚宏學周其緩急歷數十年如一日天性恬適自奉儉約遇邑中興建大事又未嘗有吝色重修其六世從祖方伯襟海瑩墓里人咸義之晚年絕意仕進杜門不出邑令劉煥曰吾一見蘇君卽知爲長者

石景義字右軍幼失恃哀毀類成人長事父巢雲先意承志無違朝夕事後母余以孝聞乙巳義倡建崇正書院勸同人公捐田七百餘畝延師較課集闔邑英才陶淑其中甲寅歲饑邑馮令議賑義偕其弟立暨諸士夫勸捐州牧胡公雅重其行以郊禱齊步旌之辛亥修葺學宮復竭力捐貲並董其事生平勇於爲善類如此惜未竟其志以諸生終子鐸鎮廷錫皆有聲膠序

宗芳山字厚菴少藉父祖業饒於資戚屬咸取給焉芳山畧無吝色或以不滿欲訾之弗校也而家以落鬻餘產入貲爲兵部司務貧困不能給饗殮遇里人遊長安者猶必質衣沽酒欸洽備至云

胡申錫字謙承翰編香山子也少攻舉子業旁通詩古文辭從父宦京師一時巨公皆引以爲友極器重之執父

喪哀毀骨立以奉父命往崇川未得視含飯爲恨學博
丁宏遠欲舉申錫應孝廉方正科不就家多賜書又喜
購佳刻牙籤錦軸古香襲人手自丹黃寒暑不輟取二
十一史考証辨駁指其錯誤多開古人所未見中年閉
戶焚香靜坐恬如也子之本之森之喬皆以文學名
李達字爾上舉康熙乙卯武鄉試胸儲韜畧植品端嚴以
親老不仕勸學課耕躬行仁讓足跡不履公庭兩舉鄉
飲不就卒年九十有一子岐邑諸生夙嫻掌故年登耄
耄

姜任修字退畊舊名畊號自芸博學於天文地理禮樂兵
刑及詩古文詞無不通貫書畫亦詣絕品爲諸生時儀

封張清恪公巡撫江南見其文奇之四致幕下講關洛
濂閩之學康熙庚子舉京兆辛丑捷南宮授庶常雍正
癸卯改授清苑縣令日理訟牘百餘事聽斷敏捷以誣
劾罷職縣民依戀送數百里外歸田後一榻蕭然吟咏
弗輟著有讀易輒書五卷讀詩小箋五卷楚詞釋十卷
漢魏六朝詩釋四十卷白蒲子古文十卷編年詩三十
六卷卒年七十有六

鄭大德字衣聞號改之一號獨石康熙丁酉科舉人辛丑
進士選浙江山陰令未幾以母憂去雍正九年赴補值
憲皇帝廣求民瘼知縣得條奏地方事件大德卽條奏山陰縣徵
糧造冊及原籍江南如臯縣私派飛差二款奉

旨鄭大德原摺交與李衛時大德掣籤山東齊河縣

憲皇帝察其能仍改發浙省交制軍李以大縣用補知鄆縣事制

軍時正釐清浙省錢糧冊籍其如臯一款密行江蘇藩
司查辦大德又細陳臯邑自康熙三十七年以前凡有
差役里長派之各戶輪充名曰硬擡是年禁革硬擡例
計畝捐派經承催收名曰輓擡公事雖歸公辦銀兩出
自民捐每年視事務多寡為輕重無定數制軍檄取臯
邑歷年簿籍果然奏請免追既往嚴禁將來於江省設
法存留公項備用以甦民困由是諸弊永革不獨如臯
山陰二邑江浙各州縣莫不隱被其澤治鄆三年以疾
歸里閉戶著書嘯歌自得所著有章貢樓易說咏月閣

文集九悔齋詩草

朱龍鼎字伯鉉號復菴別號桑田名諸生千支與宋李嵩
明徐渭同自為詩曰生成自信為徐渭變現人言是李
嵩十八歲時父生員道美以訟事坐誣艱難匡救事得
自旋以族亡命匿婢事發刃中其耳竟不死後族人奪
其宅辱其父致訟數年冤抑不伸縲絏囹圄屢瀕於危
久乃昭雪又仇家父子殺人以鄰佑被牽者數年何多
難也其間渡大江過燕子磯歷惠山虎阜瓜步金焦北
之鄒之魯之齊皆避仇匿跡非登山臨流得意尋勝者
比也迨仇貫盈自斃歸卧舊廬田園蕪奴僕逃荒涼蕭
索概置不問惟日握筆為詩文自寫其胸中壘塊鬱怒

蓬勃豪宕有奇氣晚年孫曾繞膝子二曰虛曰果九十
一歲卒著詩古文辭甚富族譜年譜各二冊爲魚嗜錄
八卷註杜律曰翼顧沉埋已久其曾孫大剛訪得之
徐建杓字文度號旬巖蚤失怙恃性肫篤與從弟瞻雲最
友愛朝夕依依有所往必偕雍正甲辰選湖南常德府
通判引對

圓明園敷奏剴切

天語褒嘉連稱好好遂

恩予記名其在官也賑水災擒劇盜慈惠嚴明仁至義盡大吏重
其才檄督京餉以除夜雨雪役夫遺鞘鐫級歸改園爲
祠置田贍族歲暮復給銀米其敦本如此修葺學宮建

立書院助膏火以培士曠地基以育嬰設藥局施棺槨
捐義塚治道路造橋梁不一而足其好義如此爲人足
智多勇力變起倉猝措置裕如嘗送弟瞻雲赴省試同
二三友人寓秦淮水閣一夕鄰寓火起已及門俯視閣
下有舟急雇之舟人故昂其直欲解纜去杓怒躍下舟
一足挽柱一手按其頸抽佩刀曰不載卽斫爾舟人惶
恐亟載之是時火已入室瞻雲及同舍生縋而下乃免
於難而身外物盡付一炬矣遂解腕上金條脫質焉爲
製衣衾並助友生入場費白下聞其事者爭欲識其人
素通技擊又工揮彈曾泊舟太湖遇盜命開窗然燭獨
立船頭曰若輩欲劫吾財當試吾技岸上廟門有環吾

女學集志 卷十六
三
九三發一在環外任所取盜方猶豫不轉瞬間弓響環
已納三九盜於是驚愕奔散生平好讀書流覽史冊工
詩古文辭每朋輩讌會雅歌投壺意致瀟灑晚年以助
直賑復原官助餉候選知府捐授資政大夫七十有八
歲卒子二長觀光官刑部山東清吏司員外郎次觀政
官兩浙寧紹鹽運副使宦績義行皆承其父風云

石立字雙峯號梅園性孝友先意承志得父母歡兄弟怡
怡少卽慷慨負大志見義無不勇爲四方知名士偶至
於斯皆握手懽如平生詩酒談笑灑如也慷慨好義葺
學宮建書院義學脩邑乘皆爭先恐後捐地租四十餘
金圩田五百餘畝備膏火助幼學出資育嬰發粟救饑

孳孳焉如不及其尤大者請除朙糧堵牙橋皆挺身對
簿幾經挫折堅持其議不可回卒得允行而民困以甦
大害以除救億萬人性命貽千百年利賴在於此矣雍
正中

詔舉賢良

方正邑令學博以立薦時督學政張葑齋賓禮褒嘉辭
以疾不就年七十有七卒子鉉任西充縣令銳貢生錦
候選州同知鉅鄧州吏目好善樂施均如其父云
石爲堽號宣六器宇軒昂胸襟磊落讀書志在經濟常慷
慨留心當世之務授湖南澧州知州州人赴歲科試必
由洞庭風波險阻道里殷遙不但資斧困竭且惴惴焉
恐禍生不測詳請於州城建試院自出貲七千餘金澧

人士踴躍鼓舞文風大振蘭水無渡行人苦之設義渡以濟滅頂濡首永無患焉奉檄率五十六州縣開墾荒田饑不暇食勞不暇息竣事列上考後因脩堤忤長官意解組歸百姓攀轅遮道送者數千人治績載州志名宦家居三十年急公好義若脩邑乘葺學宮建書院皆首白邑令倡率邑人次第舉行無倦也

朱濂字景溪號湘亭舉茂才需次翰林院待詔以子昂封儒林郎濂五歲失怙六歲失恃哀毀如成人事祖母左右就養無方遇父母忌日執爵灌奠輒伏地嗚咽不能起友愛諸兄怡怡如也性輕財重義為善惟恐不及葺學宮立書院脩邑乘增樂器建惜字菴慨然輸貲且早

夜經營務殫心力葺其事親友有困乏者未及告匱往往先為伙助其祖駕部於岔凌河施漏澤園年久叢葬既滿復捐田擴之以廣先人遺澤生平於世俗所好曾不為動惟沉酣典籍手輯儒先語錄勵行誼訓來茲子昂楸昇俱別有傳

張學舉字乾夫號南坪年幼工詩精帖括雍正乙卯舉人挑選福建鹽大使稱職有餘地任縣令丁母憂去官服闋發粵省補番禺令地處海濱豪民爭沙積案甚夥學舉請於上官乞假親勘不期月舊案悉清民情悅服值歲饑條議開倉平糶設廠數日而市價日昂蓋市僧居奇密令奸民偽為販布者插尺於布尺露一寸則米長

一錢二三寸以上亦如之日凡兩次行街市各鋪戶視
以爲準米價騰貴一日之中遠近相應學舉廉得其情
擇其尤者重懲之米價大減番禺民賴以全活以此大
吏交薦歷州牧郡守擢觀察正已率屬皆有惠政公餘
借筆墨自娛樂作詩古文甚富年七十卒於官著有南
坪詩抄行世側室夏氏事姑孝姑劉病癘不能食夏每
晨供乳病賴以痊鄉黨稱之性好施與善事難一二數
朱之瀚字有鯤號補堂兵部鳳台孫戶部廷宁子也倣儻
有奇氣頗懷經世才少從父宦京師治舉子業兼工韻
語落筆驚人爲海內宗工所嘆賞才大而艱於遇試輒
不售遂援例授光祿寺典簿亦不樂仕進居家養親朝

夕承色笑以孝稱建宗祠修譜系扶孤寒拯困厄止訟
獄解紛爭宗族鄉黨親戚友朋被德者多矣修葺學宮
建置書院文教以興助堵牙橋請免冊糧大害以革施
棺收骸捐田備葬其仁心爲質而見義必爲也如此
徐建中字瞻雲孝子洪成子當洪成死於孝建中甫七齡
卽心誌其事及長懼父孝行或湮匍匐求大吏奏

聞得蒙

聖恩旌表是時多羅慎郡王賜額曾閱遺風謂能以孝世其家者
建中大父舊築玉皇閣後遭回祿建中斥產與兄建杓
鼎新之更擴其規成先志也生平植品端潔曾辟孝廉
方正不就性嗜學枕藉經史深窺奧妙制義一遵先正

女皇鼎志 卷十一
矩獲七赴棘闈得而復失者再四舉優行督學鄧艾堂
贈以詩有望重鄉閭學探精蘊之句人謂無愧

鄭大任字蹈之號懷二其父爲讎陷禍且不測踉蹌走數
千里抵京事得白人稱爲孝以州司馬爲粵東庫大使
四川仙林場鹽課大使遷西充縣令爲政嚴明吏民不
敢訛法有治聲以母老歸養絕意仕進購野圃名東園
疊石濬池蒔花種竹與二三老友觴詠其間暇則緩步
隴上有所得輒爲詩如是者廿餘年年七十有七卒

鄭大綸字言思號掌之幼失恃事父以孝聞讀書求實用
以濟世利物爲心授隴州牧州地高土瘠常苦旱歲比
不登相地宜濬渠瀦水教以桔槔旱水法民資灌溉無

歉歲設書院置學田造就人材士皆蒸蒸日上隴俗素
强悍多藐法化以禮示以威奸民斂跡辛酉大饑甘地
民就食於隴發倉粟計口授糧全活數千人大吏曰鄭
隴州真不愧民牧也汧河素橫木爲橋夏秋水暴漲橋
卽衝壞又沙底不可易以石爲設舟四渡行旅人呼爲
鄭公渡以葬親乞假歸遂不仕所居蒲上舊南北石橋
各一南橋圯捐貲修之其他周貧苦親友施衣藥棺槨
殊難枚舉卒年六十有五子景莊景誠景綱景暉

范瑄字蒲南號舫齋以州判効力南河承辦隄工備掃料
督天役幹練精敏隄成速且堅辦宿遷賑給銀發粟民
沾實惠劉莊場病涉捐貲建石橋往來行人稱便以疾

歸卒於家生平負幹濟才有大志人謂未竟其用性敦篤孝友睦嫻任郵六行皆備焉

朱見乾字天五號曉嵐由雍正乙卯舉人選四川三台縣令時鄰境西充縣有劇盜劉斌聚眾劫掠積年搜捕不能得乾泣任甫三月遣幹役偵其出入親率兵丁民壯擒渠魁於鳳皇山下並取餘黨究治之非種既鋤去善良以安捐俸修學宮以振興文藝爲己任充庚寅同考所薦拔皆雋士後以年老力衰懇辭煩劇改授徐州府邳州學正亦可謂知止不殆者矣壽九十二子僑監生兆仲庠生孫鳴鶴邑文學

顧雲字伯固號北墅山乾隆甲子舉人補內閣中書珥筆

樞要動中機宜歷官吏部文選司員外郎矢公矢慎永絕苞苴倘躋卿貳列台輔經猷未可量也未幾抱疴歸里適性陶情構水西別墅偃仰其間種竹蒔花疎落有致當春秋佳日偕二三知己把酒論文臨流賦詩興到畫墨菊三兩枝頗高逸入神或與親戚情話或與田父野老課雨問晴意度瀟灑有飄飄出塵想見者疑其爲神仙中人不知其爲富貴中人也

戴知誠字斌章號蘧菴貢生初筮仕山東堂邑縣值水災民饑旦暮且死捐俸銀二千餘兩救饑民全活無算知臨清州事改建州城督工不遺餘力城甚完固爲安慶太守政繁劇晝夜勤勞稱厥職陞陝西鹽道未抵任卒

知誠孝友根於天性幼失怙事母氏商曲得歡心與弟
知相怡怡然終身如一日知相官陝西葭州吏目
汪之珩字楚白號璞莊幼聰慧嗜學長益篤博覽經傳爲
文恪守先正不踰繩尺尤工詩時與海內英流壁箋分
韻興酣落筆揮灑淋漓其見於甲戌春吟文園六子詩
中者錢梓蔭蔣星岩輩頗珍賞徵輯邑人詩稿爲東臯
詩存四十八卷上下數百年網羅放失推闡幽隱意良
深也生平慷慨好義修明倫堂兩香菴建水明樓置義
塚採囊輸貲無吝色亦無德色乾隆丙子歲大饑出粟
救饑民全活無算餓斃者施棺殮之他若推食解衣不
可殫述誠孳孳爲善者矣子爲霖任廣西觀察

石字字信也號省齋爲諸生蜚聲庠序肄業太學應順天
鄉試不售孝友性成其父沒未葬諸兄相繼逝值家道
中落卜地諏吉治父兄喪皆盡禮新宗祠修族譜置祭
田經畫得宜邑中葺學宮建書院不惜重貲襄事朋輩
相齟齬輒推心置腹一言解紛人稱長厚卒年八十有
一
沈全達字虞聰號朴村由知縣至知府宦遊二十餘年桐
廬安仁台州金華等處所至皆政績卓卓有古循良風
四十始仕少年才識過人理家政井井有條鄉黨遇疑
難事設言微中可以解紛而循循謙退絕無矜容其高
誼如此

如皋縣志 卷十一
吳際盛字遽仕少孤事孀母撫弱弟以孝友稱由甲子副榜仕滇南初攝和曲州轄三土司最獷悍那酋尤狡獪餽千金嘗試峻拒之自此人知爲清白吏折獄明敏多所平反大吏重其才委兼路南江州兩篆調文山有惠政暇日引諸生剖晰經義論文章法度人皆鼓舞歡欣爭自濯磨底於有成解組歸里依然嘯歌蘧廬著書自樂何其高也

鄭景誠字軼虞號默齋天資卓犖學貫古今隨父大綸隴州任十年嫻吏治以例授工部虞衡司郎中初入官卽可大司空條陳四事才識見重於時督理五城街道舖戶呈請設立功牌飭吏錄允駁批示榜通衢不得營私

延攔坊市稱便監督寶源錢局不受運官私謁直將銅劬詣局交收永絕苞苴心清似水監水廠出賃雇工運水清查註冊補其缺監堂印有堂稿未全署押強誠用印者誠持正不可在部公明勤慎堂官奏薦將大用以丁艱歸病耳重聽遂不仕家居二十餘載樂善不倦戒子姪輩讀書惟希聖希賢爲官在有猷有守好流覽史冊文有關於世道人心者往往手自點定編輯十數種存于家卒年六十有五子鸞邑庠生鴻分發浙江試用縣丞爰邑庠生以實布政司經歷

徐觀政字憲南號湘浦少儻有奇氣好讀書耻爲章句儒父建构知其才爲援例由中書授浙江鹽運副使歷

署湖州府烏鎮同知台州府通判等缺俱有循績聲上
游器之暇日偕浙水諸名流觴詠湖上竟日留連人目
爲蘇白後身既以親老引疾歸奉晨昏於水竹居問視
維謹依依孺慕徐氏以好義世其家至建杓尤勇於爲
善政則先意承志葺學宮及書院捐田爲諸生膏火此
賑饑黎施義塚疾者藥之死者槥之橋梁寺觀傾圯者
修之諸義舉所費不貲皆竭力仗助冀當厥考意蓋爲
善也而養志寓焉父疾嘗藥以進衣不解帶者兼旬顛
天乞以身代及居喪哀毀不欲生母泣諭三日乃啜粥
時時飲泣喪母氏亦如之服闋後仍赴浙補原缺整理
鹺務剔釐積弊商民便之委解回匪眷口復委解閩泉

軍餉皆籌備周至措施裕如中丞嘉其勤敏故繁劇多
藉手政政亦罔弗得當以報也顧以頻年奔走舊疾時
舉力請大吏爲退休計大吏留之不得遂解組歸息影
霽峰園與邑名流爲文酒之會疾少舒自顧精力就衰
無復出山志念邑中諸事修舉唯邑乘數十年未修恐
多湮沒乃倡議增續請於邑令力主其事偕二三同志
搜遺蹟採舊聞幽隱未彰者表揚之延名宿數輩屬稿
露香草堂中商確矜慎爲傳信之書勞心勞力政之功
居多閱五載書成付梓乃竟以劇疾死遠近惜之生平
嗜吟咏所爲詩豪放無簷簷言書工顛草多古致畫竹
在湖州息齋間所著有湘浦詩稿若干卷藏於家卒年

六十有六

朱大剛字岑灣號伸萬幼穎異工楷法弱冠試輒冠軍議
論每驚四筵家貧謀菽水養西秦一游卽古孝子陟屺
岵之心嘗作望華圖以見志後以增貢入成均昌黎所
謂深林變化真魁傑人也時甘涼觀察王芍坡涼州守
吳拙菴尊禮師事聘主天梯肇興書院臯比設經從遊
皆爲名儒致身通顯後復廣其傳於浙紹荆楚而岑灣
自此老矣晚歸里闈晚翠軒猶獎勵後進不倦歲辛酉
間偕邑紳徐湘浦等董修邑志忠孝節義之大採訪無
遺至修明倫堂葺尊經閣及關帝廟濬城河捐賑等事
又其緒餘也年八十六以壽終有岑灣遺稿藏於家

儒林

宋胡瑗字翼之謚文昭世稱安定先生自河汾以後能立
師道成人才者以安定爲首稱明嘉靖中從祀孔子廟
庭詳人物傳

王觀字通叟與從弟覲從胡先生學於上庠詳人物傳

王覲字明叟清修簡澹喜楹不形詳人物傳

范公儀字祖威少同姪良傳游胡文昭公之門遂卜居其
地

元陳應雷字道宏福建莆田人父肇衡尉如臯遂家於邑
之下駕原應雷中延祐三年解元累官至平江路總管
所在有惠政旣致仕與鄉人講濂洛關閩之學儒林宗

如皋縣志 卷之六
之明嘉靖間從祀鄉賢後裔秉鑑州司馬事孀母至孝
不求仕進居鄉里好行其德秉鑑子常宸以貲八成均
俱恪守先訓行義不怠人謂能繼武高曾云

明劉鉅洪武初舉經明行修科任本縣訓導講學於治東
五十里阜人呼其地曰劉師舖

何塘字粹夫號栢齋世爲何家堡人高祖忠一明初從戎
遷懷慶父爲懷慶武陟人宏治辛酉塘以懷慶衛籍舉
鄉試第一壬戌登進士以翰林院庶吉士授編修正德
初逆瑾竊政一日出龍川貢扇贈諸翰林時有人而長
跽者塘獨再揖瑾怒不以贈其受贈者復再拜謝塘正
色曰何僕僕至是耶瑾大怒詰其姓名塘直前應曰編

修何塘瑾愈怒欲害之塘遂累疏乞歸瑾誅召還擢修
撰以直經筵觸忌諱調開州同知改東昌同知乞歸隱
居南村四方從學甚衆嘉靖改元起授浙江提舉副使
敦本尚實士氣丕變晉南京太常卿歷工戶禮三部侍
郎南京右都御史致仕家居究性命之旨行已教人切
近精實時以比之聖門由賜塘性潔氣剛涵養和粹而
臨事毅然不可奪難進易退有高世之節卒贈禮部尚
書太子少保謚文定所著有栢齋集十二卷儒學管見
陰陽律呂管見行於世

許鳳號竹岡端凝持重究心理學爲海陵王心齋高弟著

言性錄一卷

孫應鼇字山甫世家燕莊以貴州清平衛籍中解元登嘉
靖癸丑進士翰林院庶吉士改授給事中矢心獻納侃
侃不肯阿柄臣意嚴嵩啣之出爲江西僉憲歷按察副
使督陝西學晉叅蜀藩土酋薛兆乾以龍川叛鼇設方
略擒之押送闕下奪蠻部而設版焉東川白蓮賊蔡伯
貫陷合州田純據定遠勢張甚三川幾搖中丞以鼇爲
左翼鼇夜領銳卒數百人設伏列萬炬鼓而進賊衆奔
潰斬獲數千級賊平晉按察使旋長楚藩再晉右僉都
御史鎮鄖陽累遷禮部右侍郎掌國子監祭酒事充經
筵講官上幸太學鼇進講無逸篇命坐賜茶又賜衣二
襲鼇適患鼻衄不能侍上講予告歸旋詔卽家起用工

部侍郎未幾晉南尚書且示嚮用鼇堅辭不行終於家
賜祭葬贈太子太保謚文恭臯人祀鼇學宮而清平別
有專祠墓在清平縣鳳皇山下

國朝

劉道明字倬侯號仁寶掘港場人孝友性生舉止動靜
一於禮而不苟弱冠補博士弟子員致知力行毅然有
志於聖賢不徒以詞章之學博科名著書數萬言黜異
端崇正學尚論古今有體有用一時學者宗之撰原神
論合太極西銘之旨儀封張孝先梓其靈瑩集行於世
范方字令則文正裔孫自號葆樸子少遵父崇式家教端
言矩步以明倫敬身爲實學長益肆力古文粹然淵深
專宗韓柳著默鏡居文集二冊山陰趙錦園三韓周振

如星傳... 卷一
菴兩邑侯爲梓以行世又著詩傳聞疑二十二卷詩經彙詁二十四卷同時韓慕廬陳椒峰黃仙裳張良御諸先生僉云堪爲六經羽翼其性情澹泊寡營對之如飲醇醪年逾八旬子安愚安素俱廩貢兼優文行安素子昶由明經授翰林院待詔

章純仁字仁山居掘港場家世樸素仁質直負氣節讀書窮理一準於程朱爲郡增廣生自號清溪處士鍵關績學築別業於所居之後顏其齋曰讀書學道處蒔花課子視一切利名泊如也見人慈愛恭敬恂恂似不能言至關係名教議論持正不少屈著有毛詩點注四書劄記近思劄記學者宗之稱清溪先生

錢琪字拱玉自少沈靜敦行不怠事母以孝聞爲文原本經術斥浮艷三薦不售筮之遇履之无妄謂門人曰履以兌遇乾乾爲君兌悅之五不應變而從木木遇金爲悔尅貞不售矣互而得家人家食之義也且其辭曰履道坦坦幽人貞吉我以功名故荒茲歲月曷若盡吾分內事履道而貞乎遂絕意進取與劉道明章純仁石京爲率真會譚性理往往發先儒所未發嘗謂孔孟只一權字權者仁之純義之精而心之用大學所謂至善中庸所謂時中也漢儒不識以爲反經而良知家專事心學又流爲虛寂權於何明何者爲至善爲時中哉壬辰居母喪哀毀致疾旣祥乃瘞鍵戶著書嘗晨起默坐對

周易或長歌歌竟起立日向夕忘食枝上禽鳴簾前花落俛仰之間油然陶然也壬寅以疾卒

吳峻字凌雲幼孤每早起侍父靈席前垂涕讀書母陳聞書聲亦起爲粥哺之而自績其旁寒暑無間後峻晚年五更必起益習久弗能易也學成補諸生食餼有司咸以國士目之顧數奇科歲錄計凡二十餘試靡不冠其偶賚興輒報罷自闢東田書屋講學其中遠近負笈者數百人彈射文事利病迅若風掃靡不洞中癥瘕事母極孝教弟葵成名弟亦事之如師峻風神雅淡疎雋接人坦易然好持清議里中薄行者往往不畏父兄而畏峻知前後學使者十舉優行達其名於尚書省乾隆三

朝聖書褒美賜六品服辟用不出旋卒學者稱東田先生

年督撫學使司道牧令咸薦峻孝廉方正疏其名於

石鍾瑞字輯也乾隆辛酉科舉人農部石爲崧之次子也自孩提時卽知教孝友至性過人農部家教嚴肅比長曾無子弟之過讀書靡所不究嘗云宏通博覽非止供臨文揮霍儒術中誠宜擇地自蹈孔孟堂奧程朱門戶敢不自勉耶補博士弟子員屢以優行爲學使器重居農部喪三年苦塊幾於滅性母衰病積孱親奉湯藥扶抱不假手婢婦盡瘁於帟帷者廿餘年洎居憂淚盡繼之以血兄恒事宦遊公私之費不繼瑞頻棄已產益之或諷以食指正繁尙稍留有餘爲贍給地瑞曰非不知

自謀其如手足難忍視何竟以是盡蕩其家貲辛酉計偕北上貲用拮据既下第鬱鬱不得意將往兄恒官所疾作卒於孟津縣署年四十有四瑞氣質醇粹與人交輒傾肝膽遇緩急不惜罄囊應之暇則花間布席對酒論文招邀過從殆無虛日四方名士樂與之遊乾隆元年辟賢良方正未就歿後乾隆十年邑人僉議舉孝友儒行因崇祀孝弟祠著有賜經堂詩文稿行世

李泰字台吉江寧縣學前明直殿將軍瑞孫父國聘始遷居如臯之掘港場少攻文藝三十歲後厭棄科名勇於從道由釋老莊列等書悟入性理獨闢迷途取徑於劉仁寶靈瑩集太極圖集解精心理窟一以程朱爲宗由

富境而至極貧人不堪以終日者泰處之怡如也其器量淵涵氣象醇茂有濂溪明道之風著嶺山學舍語錄一卷輔仁山房講習錄一卷

陳謨字禹書號思堂弱冠遊庠食餼二十年以歲貢終天性孝友處宗族鄉黨溫厚和平平居訥訥然如不出諸口及論古今人物賢否事後當成敗波湧瀾翻四座皆傾爲文根柢六經貫串百家雄深雅健學者翕然宗之名流繼起多賴陶成其沒也門人史鳴臯輓詞有云人範經師先生獨擅程化鵬有云鑄羣物獎寒暖行事昭於一時文章傳於奕世人以爲允當偉幹修髯胸次灑落而端正嚴毅人不能干以私蓋有道君子也

顧鋼字南英號紫崖生而穎異初執筆爲文吐氣如虹人以神童目之年未弱冠補博士弟子員旋食餼聲震膠庠江南北諸名士皆接引恐後而心益謙學益力沉酣經史貫串百家發爲文章無美不備宜取科名如操券卒困棘闈屢薦不售主講席數十年生徒至數百人得其緒餘登賢書成進士者指不勝屈鋼獨以明經終命也年七十有三子三餘拔貢生任河南信陽州州判三秀副貢生任直隸天津府通判崧文學生

顧鎔字大治號藻如克敦品節學有根柢雍正己酉科舉人丁巳會試中明通榜選宜興縣教諭門人湯先甲最貧鎔竭力扶持飲食教誨由選拔登詞林其栽培寒士

類如此俸滿授貴州修文縣令地多寇盜有劉滿者積賊害民涖任旬日卽設法捕得之一訊服罪餘黨盡散百姓稱之爲神他若養士愛民諸善政載修文邑乘後以疾歸杜門課子孫孫履厚乾隆己酉科登賢書

范承宣字敬淑號南宮讀書慕古以忠宣希宣學業自期待融貫十三經科場作五經全題文由拔貢領鄉薦壬戌成進士任揚州府教授揚俗奢華以崇實黜浮維持風教在任二十年道接蕪湖寒畯多培植之兼課安定書院得士最盛如李道南王文治鮑之鍾嚴長明輩掇高科者數十人同年賓東臯先生有博學首登循吏傳清標坐鎮古揚州贈句學舍內築室供先人像讀書其

如學集卷之六
旁每食必祭終身如一日遷德清令治尚簡清士庶歡騰以前任虛項賠累盈萬子徵銑百計憂勞幾於自盡尅日移那罄產完公清邑樂助者甚衆及歸家業蕭條著書設教怡然自樂足不履公庭銑事養無缺年八十五無疾終刻樂素堂制藝書法彙抄行世銑貢生現年七十八孫丹樹邑廩生闢梅花書室爲課子處從遊者多所成就蓋家學有淵源云

范曾輝字充光號實齋棠長子也幼穎悟讀書過目不忘研覈六經貫穿百家作爲文章超前軼後爲諸生時試輒冠其儕偶丁卯登賢書甲戌成進士年方壯盛正可翱翔仕途以親老奉養左右不求宦達終父母喪後杜

門課徒四方來學者日益衆以推闡經義爲宗以維持風教爲急陶冶薰蒸凡在門下大都皆敦品行而工文章其與人相接也無疾言遽色然不可干以私益有道君子也人無論識與不識皆敬仰之沒後門人稱文白先生著書數種行於世

叢合瑛字修五號誠齋歲貢生學宗儒先以正誼明道爲己任學博任之鏞號知人重其學行延主講席一時從遊諸生得聞緒論皆抗心希古克自樹立居平田化厥鄉人廉頑立懦薰其德而善良人稱之爲鄭公鄉焉著體仁錄四卷學略五篇道脈賴以不墜非徒撝拾古人餘論者也

錢標林字梓蔭號翥寰才識敏悟淹貫經史諸子百家無不流覽常以古作者自命中乾隆庚午經元兩赴禮闈連薦未售里居教授生徒先德行後文學教授從游諸生皆黜華崇實根柢深固發為文章蔚如炳如掇科第以去者十餘人事母孝年已七十時着斑斕衣學老萊子戲舞娛親行誼敦篤根於天性洽見博聞猶其餘緒云

史鳴臯字荀鶴號笠亭幼聰慧讀書目數行下初為文豪宕有奇氣鄉先達胡夢白姜至山諸君子見其文咸驚異謂我輩當讓此人出一頭地入學食餼聲震江南北一時知名士皆樂與遊辛酉膺選拔甲子登賢書辛未

成進士授庶常明年散館改授知縣任浙江昌化化有饑民以借糧滋事前署縣以盜論擬辟鳴臯憫之自上憲覆審得從輕擬結人稱慈惠調任象山度水勢為蓄洩計修復高平賢昌兩硤民享其利無窮陞湖北黃州府同知以父憂歸服闋補廣西梧州府同知廉潔自守盡除陋規署柳州府知府承辦軍需幹練敏捷緣母老請養歸里邑中修城垣葺學宮賑饑荒諸急務皆首先建議指畫井井主雉水書院生徒至百餘人整頓士習文風丕振生平精書畫工詩為文根柢經傳淹貫子史著作甚夥傳誦海內沒後鄉人稱文惠先生

程化鵬字馭青號培甫幼沈毅為博士弟子時輒立志非

法不言非法不行乾隆甲子登賢書卒未成進士任江西信豐廣豐瑞金縣令擢饒州府同知攝贛瑞袁三府篆撫民慈祥折獄明敏四充同考官所取皆名下士以母老請養歸里教授生徒嘗書坐隅節外不失於人易反已無疚於心難卽此見先儒直實氣象劉相國石菴寄詩云政事文章古學者耆英碩德鄉先生其梗概可想矣

冒梁鎮字山民才穎異淹貫經史十六歲補博士弟子員試輒冠其儕偶卒困棘闈不得傳一第人以數奇惜之事親孝弟崎嶇皆早逝遺孤三教養成立如巳子生平無疾言遽色而嚴氣正性人所畏憚鄉黨中少年子弟

偶有過失密相戒勿使冒先生知也教授生徒以經術爲根柢論文確守先正一歸理法同時如范曾輝錢標林程化鵬輩悉互爲切磋出其門者爲文皆有法度艱於嗣晚年乃舉子名方輝

胡之祁字京文號芸門由廩貢生中式順天癸酉科舉人一時名公鉅卿重其博學能文皆樂與友故交遊最廣選江蘇安東縣教諭以母憂歸服闋後選安徽太和縣教諭課士勤勞論文以清真雅正爲宗諸生被薰陶文體進而益上陞廣東英德縣令捐穀立倉弭盜安民多善政生平於技藝無不精尤以作文爲樂遺稿數十卷藏於家

鄭韶字虞賓號芸書一字窳濱九齡失怙恃奉養祖母二十二年未嘗一失老人歡遇父母生忌必廢餐飲泣純孝出自性成自幼寡言笑沒嗜慾和平寬大着物如薰貫徹經史工詩古文詞旁通書法奕理十九歲爲諸生名驚老宿惜數奇南北聞屢薦不售年四十有七中已

西

車嗣後無意科名以造就後學爲已任遠近從游食餼登科者甚夥非惟脩脯不取有貧乏者反飲助之暇日開詩社執牛耳一時名流爭過其門與人交不設城府生平絕不道人短其居心醇厚仁恕尤人所難能捐買房協建祖廟家雖不甚豐嘗破數千金產脫人之厄

論親疏急無不周有流離蒲上者出貲以養死則割地塋之平時排解施與每以人情極難處之事而履險如夷見人無德色退後無怨言雖事事受虧怡然弗計也沒之日不獨士林悼傷卽輿隸獲輩無不唏噓泣下嗚呼爲人若此庶乎近焉卒年六十三歲著有嘉蔭軒制藝車中草心非草文集雙吹草黃山游草秋游草咏古二百首養樸山房存稿詩集雜著若干卷子四鐵鑠鋸皆蜚聲庠序銑戊辰

恩科捷南闈魁列

黃國豫字越艇號秋巖少負異才博學工詩喜作擘窠大書曹地山宗伯目爲國士屢書徵入長安以母老辭不

如皋縣志 卷十一
就父惕菴蚤卒母多病侍養三十餘年未嘗離晨夕鄉黨皆以孝稱敦宗卹族篤交誼而矜尚風節雖城居足蹟不入官府甲辰歲試郡沙籍占邑學額二名幸邀同學請於學使者復之至今仍其舊年七十五以明經授揚州府訓赴任未幾卒士林悼之著有越艇全集四傳精華海陽紀逸若干卷載藝文志其子端砥行力學亦多所著作修邑志與爲分校者也

孝友

宋丁天錫赤岸鄉人性沈靜有器識博學能文父蚤卒五母周至孝有盜入其家以兵嚇母天錫身衛母曰寧殺我所有任取之盜亦自慚曰天不殺孝子於是母子獲全治平四年母病革語天錫曰死生人之常也况年九十又何憾已引聲浩歌而終親歿喪葬一稟於禮終身衣不純采歿祀鄉賢祠事詳王觀所撰墓誌

嚴希孟沿海鄉人嗜學能文父文式蚤卒事母李盡孝元祐三年母病疴醫禱弗愈密剖股炊糜以進母病遂痊越六載母哀毀如禮居喪三年未嘗見齒鄉人語曰嚴家孝子無雙

錢涪字申伯翰林學士魏之孫也家貧而豐於養母居喪哀毀骨立廬墓三年

史聲沿海鄉人元祐間以進士登顯官始家貧失母帶經樵蘇以給父養而自甘糲食時抱愁也及授官迎養中途聞父訃即跣奔四日至喪所慟幾絕扶櫬還葬結廬墓旁躬負土培墓成壟如山遇弔者惟觸地叩哀而已明柔永父榮陷大辟永詣闕請身代上憫其孝併釋之改戍邊衛時號孝子軍許主事孚贈以詩有捐父生身代父身之句後孚以靖難飲醜死忠臣孝子並著一時云吳儒白蒲鎮諸生也性至孝嘉靖中父殯在堂而倭突至人狂走避去獨儒苴杖守棺哀號弗輟倭以刃加其頸

弗為動倭知其孝子也力引之去出門復還守如初倭繼至者相視捉鼻授以號帶後來羣倭見帶即舍去時倭所過多焚殺唯儒家獲全

姚山掘港人年十三父病革晝夜悲號焚香願天剖股肉作羹啜之父疾愈居常得異味必懷歸遺父父或與人競則號泣諫止父故業屠山踞哭請易其業父從之比長補弟子員孝德益著居喪遵禮言笑不苟蚤卒士林惜之

嚴正父怡宦十五年廉無所遺又性好客客至輒留飲正時時質衣物治具極驩而罷父病侍左右衣不解帶者累月及歿哀毀幾殆出必告遺像而行母弟客死間關

如皋縣志 卷之六
百狀竟持其喪歸撫諸遺孤猶已子前後有司皆表其門

李宗渤字迴瀾父知忠母許孺人年十二母病割股以進負鉅創血涔涔下卒不合家人知後十年宗渤染重疾垂絕復甦姑溪之巫曰病人有裏創帛藏某櫃中燕灰飲之當愈啓櫃則削與幌在焉如巫語而疾愈

顧昇居縣東三里種蔬養母孝謹備至母疾嘗欲割股以進母禁之而止及母亡水漿不入口者三日自恨前志未酬必欲從母地下一夕竟自經於塚前事在萬歷丙辰秋

耿明仕邑西村農家子也父潢病膈噎諸藥不療明仕

香夜禱割股進之潢病尋愈又有夏承宣者亦農家子父禹年病寒症垂絕承宣禱於神割肉作羹年不能咬僅啜其汁而甦事俱在萬歷丙辰冬

婁如崙以母洪病亟籲天請代自割股啖母母病旋愈異日母復病崙弟如嶺亦以股肉進時人稱曰雙孝先是閩左有何材者亦以割股聞至今稱何孝子

產表孝子許文炳字玉宇鴻臚寺序班母蔣守節耄年足不履地文炳出入扶持不離左右蔣患背疽文炳以口出膿血不嫌穢汚瀕危將割股姊泄其事於母母責以大義乃止日夜號泣燃肌禱天願減己算以益母壽母病旋愈後居喪泣血三年未嘗見齒崇禎庚午建坊旌

之題曰一門節孝今祀忠孝祠

國朝許石陞字元文幼喪父事母陳氏奉甘旨承色笑朝夕勿懈陳教子最嚴嘗曰汝能力學成名卽孝矣石陞益發憤讀書爲邑諸生值母病革石陞焚香祝天割股和羹以進母疾立愈

吳維翰字周遺父世家早逝母劉氏撫之成立弱冠補弟子員以孝聞雨憲燈案續父所著廣益遺篇每掩卷揮淚不減王元偉讀蓼莪時乙酉初偕母避亂隱居蒲村十畝桑田僅供饘粥布衣蔬食安貧樂道宴如也母歿居喪哀毀後遂謝浮名遠聲色與緇衣黃冠爲伍每逢親誕日忌日必齋戒涕泣以祭焉

范端字簡夫生有至性事父母純孝年十五時侍母盧宜人疾湯藥必親嘗時盛暑衣不解帶兩閱月爲文籲天願以身代夜分獨起設香案於堂前覓刀割股而家人窺知之藏匿金刃乃於厨下得久棄鈍刀割不得下負痛就階石磨之聲霍霍然封翁驚醒出視之已再割矣相持痛絕作羹啖母病以愈歲餘乃卒端居喪盡禮哀毀動人服闋補弟子員旋食餼才敏學贍挾策遊京華受知於宗相文肅公薦登仕版筮仕河南儀封令廉明愛養利興弊革薦舉卓異歷陞東兗郡丞勵精河防任滿力求終養藉內轉遂歸省之願侍養三載溫清定省無少懈已復起補計部郎以父憂歸居官居鄉狷介高

如皋縣志 卷十一
三
潔一塵不染與弟相友愛士大夫皆矜式焉

冒丹書字青若郡廩生憲副起宗之孫司李襄之季子也
崇禎末年賊陷襄陽憲副適受監軍之命誓以身殉司
李號泣請於長安諸公乃得解任歸憲副易簣時呼兩
孫嘉穗丹書至榻前手勒十字曰爾父天生孝子不可
不學兩孫敬受教庚申秋賊挾利刃突入襄家丹書赤
體護父賊不能近身受四創父因得脫人稱至孝云丹
書工制舉業及詩歌古文詞因頓未第以明經授州同
知非其志也有枕煙堂卯君詩再生稿西堂詞諸刻

表孝子徐宏成字自西邑附貢生父勅隴州同知母沈安人

宏成性仁厚兒時嬉戲不肯傷蟲蟻六歲師授小學及

古忠孝事類必振襟聽受十歲喪父擗踊哀號寢食盡
廢事寡母沈養體養志歲製衣襦藥餌以救貧病母日
誦陀羅尼經夜分登樓拜禮三辰宏成衣冠侍立琉璃
光下十餘年如一日康熙乙酉正月母中寒疾勢甚篤
宏成遑迫醫藥禱祀無寧晷食飲不下咽母死號哭嘔
血殞而蘇者再積十三日亦卒遺命以衰服殮葬母側
子建中旣長以其事上有司雍正戊申

詔下旌其門學使者張廷璐過如臯弔以詩云摧心風木報難伸

泣血依然孺慕真地下相從成孝子庭中立槁繼先民
詩書已見貽謀善綸綍還膺錫類仁爲景儀型勤採訪
輜軒頻駐古淮濱吟罷憮然題臯魚至性四字於華表

如皋縣志 卷十六
而去建中醇謹嗜學與吳峻石鍾瑞同以孝廉方正辟
不就

旌表孝子石京字天中方亂定省有常度若夙習者父涉游學
廣陵疾篤京聞徒跣往家人以幼止之號哭不聽晝夜
行三百里亟趣舟扶父歸抵里越日得終於寢京勺水
不入口四日祖母敦譬親持粥銜泣命啜之京復哀悲
欲絕已爲強進半盂許母張哀悼成疾京晝夜不眠籲
天愿以身代母素苦飲藥每跪奉床下母哀其志强服
之母竟卒痛不欲生祖母劉亦傷懷不已京懼改戚容
事之夜則嗚嗚泣簞爲之漬逾二十年劉卒哀毀骨立
杖而後起居廬三年不脫衰裳每忌日輒哀痛不食初

父疾革語京曰祖遺產當盡讓兩叔予躬耕雖無多畝
足供汝朝夕他日兩叔必欲均析之京愀然曰父命也
乃相與推爲公儲以贍其族舅氏張錫九家貧無子京
絡繹致遺靡間歲月錫至八十餘出一冊謝京曰爲若
著錄存之計千餘金矣又浙東潘冰壺執友也寓臯邑
貧甚京以時周給歿復割田葬之京少工文爲諸生不
遇鍵戶撰述用丹黑筆作小楷蠕蠕盈幅成籍者幾滿
一乘四十餘年絕跡公庭婦女童稚咸知孝子名臚其
事詣有司請旌京聞謝曰予罪人也何可以父母市名
涕泣固辭乾隆二年有司卒上其事

詔建坊旌其門今祀忠孝祠子大鐘鑑鏹維量皆恂恂謹飭克荷

門業

冒寰瑋字季昭貢生起年嗣子起年卒無嗣妻鄒愛其賢立之母邁危疾醫者難之瑋每夜焚香祝天願減己年益母壽忽棟間生芝香滿一室母病霍然愈遠近異之邑令李振奇親詣其室慰獎之贈以至孝通神額時祖父母俱慶糗餌之屬必手調以進昕夕未嘗離左右兩老人安焉又迎養本生父母於家喪葬悉盡禮宗黨交稱瑋沒後邑人許嗣隆等白其事於督學旌之曰純孝可師子勗別有傳

鄭勦號克襄別號贊菴由弟子員貢入成均候選學正喜讀書期爲實踐之學不屑屑舉子業有至性七歲時遇喪親者求楮不可得卽解所佩銀百練與之歸語其母母爲嘆異母錢氏大京兆淑湖公女孫康熙九年嬰末疾鑿藥無效勦號泣籲天刲股以進母病愈後三年歿哀毀過禮廬墓守制未嘗一窺內戶執父喪亦如之爲人慷慨好施鰥寡孤獨有以饑寒告者必厭所欲改鎮之延嬰堂爲育嬰延嬰者接嬰兒送縣收乳之育嬰則收育於鎮可免道途寒暑之虞以此全活者不可勝計兩弟皆通籍季得京職俸入不給時時周恤之婚嫁其子女如已所生老而鰥居惟以義方訓諸子皆迄有成立他無間也年七十有五考終牖下贈奉政大夫山東濟南府同知從長子大毅所居官也次子臨候選鑾儀

衛經歷皆別有傳季子大綸官陝西隴州知州有循聲
羅世德字清臣家馬塘場雅仗名節善讀書母疾劇醫告
術窮世德違遽夜叩天封股肉膾而進之母尋愈嘗慨
末流侮老凌長悉由宗法不明爲建家廟以睦之又嘗
造石橋以利涉者年八十五卒事詳鹽法志

馬日修字天爵母極在殯鄰火延及居宅日修抱極痛哭
人力挽之出不聽忽一青衣人冒火入曰爾後余前昇
以出急從之果昇極出叩首以謝不知所之矣九十六
老人許瑤述其事

張嘉譽字蘭畹赤岸鄉人性至孝宗族張思遠張芳裔紳
士冒天錫陳謨史策石升等詣縣舉嘉譽孝行有云父

病而誠求北斗延壽一紀有奇親葬而獨守西阡廬墓
三年之外前令陳文海給匾旌之

朱龍雲字雲車父道坤力學早世母吳多病病時龍雲割
股和藥以進母病以瘳既而病復作且劇醫家診之爲
肝疾投藥輒不效龍雲頓念以肝益肝當得愈遂剖左
腹割肝肝寸許墜地上血溢如泉仆地氣絕家人驚扶
之少甦開目戒家人勿言促令炙肝進母母病良已龍
雲亦以善療創尋愈異哉孝之所感微矣哉事至奇理
則正也事在康熙庚午邑令王公所陬以至誠感神額
旌之詳請司院飭照揚州蕭孝子日曠例立祠春秋致
祭孫搢廩生請于督學夢公麟給以孝心獨苦耐祀忠

如皇朝志 卷十一
義孝悌福其族曾孫大剛彙刻百餘年來海內歌頌孝
子詩文爲孝行紀實四卷

梅嶺北郭人事母至孝母多病嶺侍奉湯藥衣不解帶動
息不敢離一日出門乞藥餌比歸則母已溘逝嶺痛母
之亾已之弗能視瞑也仰天大號躍起尺有咫足抵地
如墜巨石俄而顛仆聲頓漸人驚掖之而氣已絕視其
履履底俱脫矣聞者無不哀之邑紳士並爲詩歌紀其
事

鄭藻字文江天性純孝隨父母赴姊之夫徐忻署署夜半
火起勢已烈藻倉卒奔至不知父母之已出也冒火尋
救父母自外急呼之出則遍體爛顧甚喜喜親在忘

其痛也而創已甚翼日遂卒
傳焉

程國寶字楚善博學工文以家貧親老棄舉子業效白圭
計然術營貲財以供滌滷溫清抑強備極孺慕有兩弟
終身歡愛析箸皆歸其田宅自取蔽陋蓋深念鞠子哀
友于弟者睦親族鄰里寡天誼敦篤嘗錄先儒格言旣
自勵亦以訓後人於司馬溫公崇文公語手錄尤多子
化鵬進士官江西饒州府同知

冒有萊字雀篋號北山貢生候選州判時

憲皇帝開保舉學士汪蘭枝以才具優長堪膺教令薦揀發粵
西用母老泣請終養與弟有慶有筠依依膝下母氏顧

而樂之性嗜古書畫風致高然

朱昂字衡峰號岳西需次州同知為人坦白簡易有孝行父濂病篤禱於神願以身代及父沒泣血三年哀毀骨立見者動容撫兩弟友愛周至故人有遺孤幼而貧爲延師訓誨學成登鄉薦親戚難窶者解囊助之至於修學宮葺書院及掩骼諸事當事均延爲董事信首興舉不遺餘力子洪壽官湖南江華縣錦田寨巡檢

鄭人瑞字五雲號可山需次州同父大毅官濟南司馬母未偕留侍母左右承歡以孝著父沒課兩幼弟選國瑞讀書勤而有法後選卒勸督猶子韶益切韶以己酉中副車瑞嘗欲建宗祠忽嬰疾以沒子琬繼志建祠焉未

幾亦卒嗣孫錕邑庠生

石中錦字燦文性純篤母顧病刲股和藥進未廖繼母徐病革復刲股以進病旋愈邑人姜恭壽徵詩傳其孝

范元敬字鳳三號薛堂父病革刲左臂入藥密自纏裹夜仍侍寢榻及旦家人見堦除血痕疑焉強解衣視之餘血猶浸漬襦袖間乃相與驚歎母徐早世迎徐之母養於家始終無惰容事繼母朱竭力侍養曲得歡心與兄元琳友愛最篤丙子歲饑友人死貧無以殮元敬方抱病且時值拮据猶貸金助之篤行君子也子輅乙未進士官四川長寧令

冒邦彥字英三號印山歲貢生父瓚以公罪徙豫省母隨

往祖車書年已邁家無儋石儲邦彥資館穀奉養甘旨
無缺能得祖父歡祖歿邦彥數往豫定省父母以家累
不得留父卒於徙所訃至晝夜奔赴痛不欲生哀毀骨
立方謀歸里母又病尋卒邦彥益哀拮据萬端扶兩櫬
以歸營墓田喪葬盡禮以一寒苦儒生而能如是禮有
曰竭情盡慎致其敬而誠若其邦彥之謂乎著印山詩
文各若干卷存於家子玉錕附生玉鐘廩生玉鎔增廣
生

沈爲樑字杏堂號雲巢候選州同樸材次子幼嗜學長隨
父任佐理政務請吏治顧性恬淡不慕仕進居鄉恂恂
卹宗族敦睦嫻有古君子風事母以孝聞尤篤友于兄
爲棟合秦中因公賄累樑變產數千金代繳得免議尋
擢府倅卒于任樑跋涉三千里迎兄喪歸葬年六十艱
子嗣是歲舉一子卽嗣兄後兼承已祧足徵孝友之報
云邑中公事無不共相爲理同人尤稱之

沙樹榆字憲杜號定齋考授州同知卽鄭志所載人物傳
內躍其之仲子也母梁先後早謝世常恨孝養未盡逢
誕日忌辰家祭後必至墓所涕泣悲悼孺慕終身無改
兄弟十人榆居中友恭內多所曲全昆弟分析後有蕩
鬻田園者榆出貲償其值而仍令取息以贍其身事庶
母蒞尤能全父未竟之志里黨有困乏加意贖卹遇公
事如修學賑荒皆竭力勉副史笠亭太史作傳藏於家

教子孫讀書長子熙忠有聲譽序幹練老成惜未能展
次子熙惠成童卽失怙秉性純厚事諸兄友以全孝一
如其父困小試入成均以績學未遂顯揚一子增齡督
課甚嚴弱歲遊庠屢試冠軍辛酉得選貢因父諱本科
未與

服闋補考卽回里攻苦益深亦復恂謹人以爲孝友之報

云

馬大良字白鵬號山子歲貢中式順天鄉試己酉科舉人
生而岐嶷髻鬣能文父雖晚年得子而督課甚嚴故弱
冠游庠食餼庚辰年母陳氏病篤割股奉藥得痊後遊
燕京名噪藝苑著有自怡齋文集

忠烈

明朱顯忠有勇畧洪武初從征澤潞平原有功授濠梁衛
指揮僉事四年從潁川侯傅友德克文州遂留守之未
幾僞夏平章丁世真誘合番寇數萬來攻力戰卻之僞
帥趙復與世真攻城城中食且盡外援不至部衆咸勸
忠姑棄城徐圖之徒死此無益顯忠厲聲曰爲將守城
城存與存城亡與亡豈有怕死將軍耶詰旦攻益急顯
忠悉出兵東門拒戰世真復攻西門日且暮顯忠被傷
累創力戰城破死之事聞遣使賜祭一壇贈鎮國將軍
都指揮使仍厚卹其家

許孚字恒二世爲蘇州震澤人元末隨父陸七避亂如阜

遂家焉舉建文己卯鄉試爲方正學所得士靖難時官工部主事權蕪湖關聞金川失守方殉節北向再拜泣曰吾師獲死所矣憶吾始獲售試題爲託六尺之孤榜首劉師目爲烏中孤鳳孚不敏竊附劉君後敢負所知哉遂痛哭飲酖死

許直字若魯父邦靖直幼績學鏤刻課文不當意輒蒙被卧不食登崇禎癸酉賢書甲戌成進士出湛持文先生門先生贈朱提書格二美其端方不踰尺寸也除浙江義烏令以母憂歸哀毀骨立寢泣柩旁茹蔬三年服闋補惠來縣舟行入境見一稻秀河中異之拔視乃出一尸鼻孔中卽尅期捕何道秀竟得之吐情實置於法惠

來大旱直深自咎責閉城隍廟門與神約三日不雨焚其廟夜夢神告曰已得請於帝當先雨萍後乃雨雨直以語人不信越日果符其言以治行第一擢吏部主事晉員外郎杜苞直絕請託清通簡要名震京師甲申流賊薄都城直約同官爲死守計貸金饗士無何城陷人莫知帝所在喧傳帝南遷直急變服往甫出門見賊衆充斥卽返曰事勢至此出將安之我上英明肯隱忍播越以貽國羞乎俄聞帝崩直大慟曰國亂不匡君危不濟吾惟一死而已客羊君輔李羽中泣謂直曰父老子幼天下事未可知語刺刺不休直瞑目不應已執客手曰老父自幼以忠孝爲訓今君死臣生爲老父辱不忠

卽不孝君母復言乃北向拜君南向拜父秉燭作絕命詩六章又作書寄父出銀書格一囑寄老父以遺孫子曰此十年前吾師閣學文先生所賜曩乏斥其一留此不可不珍也以好語慰二客去復語僕曰翌日若從道速歸勿少留呼一僕隨入寢室取麻練命作環僕戰愕涕泣不止叱之出扃戶自經死一手持練尾一手上握凝然懸室中越三日乃殯面色如生崇禎十七年二月十九日也年四十有四初諡忠節

國初

賜諡忠愍特祠祀焉

繆九鳳字鳴岡號威仲生平尚氣節博學師古年

二二遊

鄉校由選貢中庚午癸酉兩科乙榜釋褐授於潛令時年未及冠體清羸如童子於潛掾吏羣謁於里第九鳳緋衣烏帽出廳事羣吏以其齒稚有慢容九鳳危坐正色訶責之吏咸畏服履任視事精明通敏以和出之民被其澤擢瑞州府同知屢署太守監司事皆能其官時值軍興羽書旁午裁決如流而自視欲然國變棄官不知所往其家人亦無還者

國初籍其田宅入於官

李之椿字大生號徂徠新泰令上林孫光祿署丞伯龍子也神彩奇麗志意介然萬歷壬戌登文震孟榜合王遂東倪鴻寶黃石齋王覺斯爲天崇五才子由行人選入

司勳曹甄奇錄異人不敢干以私以直道取忌見謫蕭
散夸曠與伯氏道生倡和霞起園天下慕其風流福藩
立南京起壘卿督糧浙東鼎革解官自歸而難作以藏
故明勅印未繳逮獄論流順治六年下

詔書曰

勝國初亡人人未免有故主之心况居官食祿者乎凡順
治五年以前犯者勿作叛論罪既雪卽擔簦入武彘山
後中蜚語復被收門戶憤裂宗族毀敗繫之石城獄中
遂絕粒勺水不入口積十四日而死弟石生奉

旨釋歸

許德溥字元博父國欽母前死事後母以孝聞初喜讀周
鍾文及聞鍾從賊卽唾罵燬其稿元博有宗人直者殉

國難元博壯其節嘗追慕不衰初聞北京破痛哭數日
不食聞揚州破又痛哭數日不食後以髻首其思明狀
論死

顧春臺失其名聞國變同妻女赴水死

官隸章姓失名國變攜妻女投水死

國朝昌重光字御六少隨父渾之蜀軍門奇其才擢用之隨
奮威將軍岳鍾琪征羅卜藏丹津重光間道走西寧偵
得賊情虛實歸命爲前鋒勦熟當十二部落勝之是時
加爾多阿牙子哈隆謨斑嗎牙最臬重光請曰沙漠迷
漫非嚮導不能前金川瓦刺熟番可使請往調焉其會
長驕甚日坐碉樓笙歌宴飲重光仗劍入語曰奉命徵

調來幾日矣留不遣何也會懼伏即舉三千以從番故
不按紀律重光斬一人以徇無敢不用命者乃會大軍
深入斬阿牙子哈隆護手刃斑嗎牙丹津以數騎遁去
閱數日獲丹津姊甥三人於枯布又獲散卒三十餘人
於花海子又獲其黨洪台吉於哈嗎兒打撒悉縛詣軍
門西路平時南坪營羊崗番猶相爲犄角重光單騎入
寨曉以大義誅賊首怕拉雙務塔南路亦平大將軍次
第軍功以重光最遂遷充侍衛逾月擢薊州都司遷固
關叅將五閱月授河州副將

寵賚甚渥

河州地逼邊陲番民交錯保安堡土酋王喇夫口素負
固倡諸屯並噶鄂畢堂逆番騷擾土門積石間居民苦

之重光奉檄統西涼三鎮官兵勦撫乃先攻李計二屯
生擒王喇夫旦而噶鄂畢堂相持不下一戰大破之斬
首千餘級生擒百餘人噶鄂畢堂平脫吳二屯以次納
款焉是時寧遠大將軍將用兵伊犁謂重光曰吾得子
共事帷幄吾無憂矣己酉夏六月大將軍出塞傲重光
督軍需兼領車兵赴營途次拜

上特賜花翎

蓋異數也十一月屯兵巴里坤擬來秋大舉渡伊犁

河直搗準噶爾策楞巢穴領五營及各路官兵簡閱訓
練眠食都廢力疾視事軍吏請節勞重光曰我從行列
超擢至此敢愛身耶遂卒於軍營

優卹加總兵官

喪車出巴里坤將士悉白衣冠哭送之乾隆間

如皋縣志卷十六
三
賜祀昭忠祠五十九年

特賞世襲恩騎尉嘉慶八年

勅建昭忠祠於通州祀之本邑忠孝祠亦祀焉

如皋縣志卷十六終

